

洗冤錄
摭遺

洗冤錄撫遺卷上

仁和葛元煦理齋

檢驗總論五則

辨正云多賣弄四鄰今作或聲張四鄰案此謂吏件作姦先縱四鄰走避也故云多賣弄改爲或聲張說得太輕非書本意○則姦囚之家今作則行凶之家案囚卽行凶人此謂藏匿凶器於家必囚之姦者故云姦囚之家改行凶便淺

洗冤彙編載試將病死之人細爲蒸刷果全身一副白骨則檢驗真足憑信恐有舊時跌撲痕貴審之無失

集證註云檢骨諸法固已周備然猶茫渺難憑蓋有色不分明謂之黃亦可謂之白亦可者亦有虛怯之傷理應瘥於骨殖而年老血衰不能瘥及者又有傷在皮肉並未損骨而人太虛弱亦足戕生者種種變幻原驗之員易於偏執刑件之輩易於欺朦似當虛心察理以求其真未可泥於書而滋惑也

續緝云磕破未必致死之說未可盡信如年老之人與人爭角自

行磕撞或木或石傷痕深重而死或傷不甚重而年老氣血衰
憊不勝痛楚因而數日或數十日斃命者往往有之大約磕撞
之傷當細驗其被傷之物或木或石或高或下木石之傷或橫
或直或凹或凸或尖或方或圓或平詳慎驗視比較屍痕分寸
果否相符雖有疑難
之案入手即明矣

驗傷及保辜總論二則

續輯云生傷已經結痂未便開看據驗骨塌實未能保無損傷後
已長有新肉則其骨損之處自己接湊生肌抓落血痂以致進
風而惡血已無凝結在內故肉仍未潰○直督賈啟瑛覆查得
灤州民賈士台誤毆張永久受風身死一案奉部駁以賈士台
毆傷張永久左額角皮破骨塌驗係致命重傷且于五十日保
辜限內死與原毆傷輕之例不符等因查張永久毆傷之初即
將蒲絨掩裹瘡口及至保辜驗傷已經結有血痂未便再行開
看致使透入風邪故僅可量其口之分寸骨之低塌實未能保
無破損傷痕第已死之後瘡痂既落若骨有破損不特傷痕顯
著抑且按之聲响今據訊作作驗報屍傷已經長有新肉形如

榴子無從見骨按之僅覺微低並無碎骨聲响則有骨損之處
已經接濟生肌似屬可信況查額角係要害之所設果受傷深
重自必骨裂腦出昏暈難蘇乃張永久尙能飲食力作曾無痛
楚之狀止覺痒而難忍蓋因新肌始長血脉融和故如是初非
瘡發之象揆厥情勢張永久之未經受有重傷似屬昭然至
所以塌而不破抽風不潰之故亦因毆打之時雖經微有損傷
未至折裂故僅與他處稍低而不露有破口至新肉雖長尙未
堅固若不加謹保護猶能透入風邪致成抽風重症然惡血已
無凝結在內而于肉仍未潰也且查張永久于雍正十年二
月初五日被毆受傷迨至二十四五等日肌已漸長乃因生肌發
痒抓落血痂于三月初一日風始抽發至初六日殞命據屍姪
張宏謨供稱口吐沫子兩手牽動嘴眼歪斜等症則確係抽風
所致已無疑義即無論傷重與否俱已與恩詔毆打受傷
當時不曾殞命或越數日因傷風而死之條并誤傷爲輕等例
相符均應得邀末減

屍格二則

附記云刑部覆雲南撫伊查本部頒發屍圖部位本屬詳備奉行已久今該撫咨稱屍格小臂膊小腹未經指定名色相驗之員雖可意會究屬互混請一律參註等語雖屬詳慎之意但查屍圖內致命臍肚小腹均已分載明斷其屍格原可照屍圖一例填註至小臂膊雖於格圖未經註明但非致命之處向來內外衙門凡遇相驗屍傷時俱填註手腕近上肱肱近下辦理從無錯誤屍圖屍格係屬奏定頒行且非關係緊要未便猝議更添相應咨覆該撫可也

續輯云指筋驗傷各條山東臬司爲通飭事照得洗冤錄載仰面致命共十六處頂心偏左偏右爲三項名目各異卽奉頒圖格內亦開列甚明所謂偏左偏右原在頂心兩旁然既立有專名部位各異則驗報傷痕在偏左則曰偏左在偏右則曰偏右自不得牽連頂心名色如果傷痕與頂心相連亦當聲明頂心相連偏左偏右字樣若頂心並未受傷豈容牽連混報致滋錯紊又如顙門額顙人中唇吻牙齒口舌咽喉食氣嚙腔心坎肚腹臍肚腎囊莖物以及合面之腦後髮際項頸脊背穀道等處均無左右之分其或傷痕略向左右兩旁祇用填某處左傷一處或報某處右傷一處不得開報偏左偏右字樣致與顙上之

偏左偏右混淆又如傷痕有自仰而透至合面者相驗時只須從仰而起傷處聲明透至合面譬如在左手心即稱左手心傷一處透至左手背長淵若干不必相驗合面時又報左手背一處其自合面透至仰面者亦然若仰合兩面重複分報則似以一傷而有兩傷矣再被傷之人例禁擗驗原恐勞動風吹易致殞命而驗看活傷只須驗其長淵分寸不可探驗深淺若已經敷藥罨護更不得揭動以致傷風等因乾隆二十七年山東省例

洗罨一則

附記云寒冬屍身僵凍傷痕不出必須掘坑用柴炭燒令通紅將火爬去用醋淋之昇屍置坑內屍下宜襯令虛空仍用衣服覆蓋蓋再用熱醋淋遍坑口用木橫格木上以蓆簞掩蓋蓆簞之上再加草束厚罨不令坑內出氣俟頓飯時將坑口揭開一面探看如屍肉已柔軟即將坑口蓆片揭去擗屍出坑細驗其傷痕無不畢見但須留心察看勿令攤罨時屍身爲火所炙緣京師地氣較寒又值冬月不能不用火坑之法如天未甚寒屍身亦未甚僵凍先用熱水沖洗數次俟屍肉柔軟再用熱燒酒擦之

其傷
亦現

覆檢二則

集證註云屍變避穢之法最好以真阿魏塞鼻孔次則用大黃川椒亦可或用好燒酒以布塊浸之掩於鼻孔屍旁多燒粗草紙亦可解穢

洗冤集說云先多燒蒼朮皂角方詣屍前檢畢約三五步以醋潑炭火上行從上過其穢氣自去矣或用真麻油塗鼻孔邊或用蘇合丸塞鼻孔亦可

辨四時屍變一則

續輯云粵東天氣冬月亦有炎熱之時屍經一二日卽變動不得拘定又潮州每用鹽數斗覆屍可經一兩年不壞者

驗婦女屍九則

集證註云河南固始縣處女田二姑屍身令穩婆試無黯血以爲被姦已成據老練仵作供稱人死則血寂安得尚有黯血洗冤

所稱原不甚確惟探以指頭處女竅尖婦人竅圓較爲的確
集證附二形人云吳縣民馬允升妻王氏與金三觀妻周四姐姦
宿一案驗訊周四姐產門內從小生有軟肉椿一條與丈夫交
媾並不關碍肉椿舉發仰伸出長有二三寸粗如大指可與婦
人通姦查本草綱目載五不女螺紋鼓角脈螺者牝內旋有物
如螺也紋者竅小卽實女也鼓者無竅如鼓角者有物如角卽
陰挺是也脈者一生經水不調及崩帶之類又有五不男內曰
變者體兼男女俗名二形晉書謂之人疴其類有三有偏男卽
女值女卽男者有半月陰半月陽者有可妻不可夫者此等並
無生育之道

集證載打胎未下身死云乾隆五十九年樂安縣黃曾氏服紅花
麝香等藥打胎未下身死驗得肚腹堅硬按有胎孕致命產門
血水流出口墜胎冒風身死云仰面面色青眼口歪斜口內有
涎沫流出兩手微握肚腹脹產門有血水流出口兩腳微曲○墊
傷胎孕身死云驗得仰面致命肚腹高心下至臍肚以手按之
堅如鐵石係有孕數月左脇一傷長三寸寬一寸紫紅色係木
槓墊傷產門有血水流出口被姦受傷身死云驗得仰面面色
紫兩眼胞開兩眼睛紅色口微開產門紅腫有餘精流出合面

兩肱肘有擦傷一片週身紫紅色○又幼孩驚風身死云羅瑞
仔於初三日上午伏桌睡臥被宗宜拍桌驚醒羅瑞仔受嚇於
是夜身發潮熱次早手足牽動患成驚風病症至晚殞命報縣
驗得仰面面色黃兩眼胞俱開兩眼睛歪斜兩臂腫脹拳曲兩
手心微黃色肚腹低陷穀道穢污○又附雞姦被毆身死云驗
得仰面致命額顙一傷圍圓三寸六分左太陽一傷圍圓三寸
七分均去粗皮係砂石擦傷不致命左手腕接連肱一傷長
九寸寬三分微紅色係壓傷致命胸膛接連右肋一傷橫長九
寸寬三分微紅色係墊傷合面穀道破損血出○雞姦不驗糞
門駁語云梁六保果與許廷獻雞姦日久何至因許廷獻不買
草帽微嫌輒爾堅拒至死不從且查乾隆五十三年刑部議
覆廣東雞姦被殺案內律例雖無查驗曾被雞姦之人糞門明
文但強姦處女則有驗明陰戶是否處女之例已可類推且死
者既無生供則必驗明死者糞門是否寬鬆方可為通姦之據
等語今梁六保糞門曾否驗明寬鬆
未據報敘殊屬率混飭再研審解勘

驗骨二則

附記云地中有不化骨乃人生前精神貫注之處其骨入地雖棺衣爛身軀他骨皆化爲土獨此一處之骨不化色黑如碧玉故負米者死肩骨後朽與夫死腿骨後朽以其生前用力爲精氣結聚故入土不易朽

洗冤集說云童體未毀者顙門骨不合已毀者顙門骨合又童子真元未毀者則陰莖尖皮聚龜頭聳而不痿已毀者則陰莖下垂有血液精滲流出然此祇可驗童體之真偽未足以定姦情之有無也蓋世之狂童十三四歲而峻作容有故弄其陰以傷真者佛氏所謂以手出精爲非法淫者是也

檢骨十則

附考云查檢骨與驗屍其傷有內外深淺不同故圖格內亦有致命不致命之別左右血盆骨在驗屍圖內註係不致命係指在外傷痕而言在洗冤錄論沿身骨脈內載髀骨中陷之缺盆卽血盆骨註云髀骨中陷之血盆喉喉中之結喉曲鬚上之頂心眉際末之太陽與鼻梁山根印堂腦角竝斜骨下腰門皆致命要處檢時最宜細看他骨一傷不過成殘疾此數處若傷立致

畢命等語是以部頒骨格圖卽按照洗冤錄所載將血益骨註
爲致命乾隆三十八年例○乾隆二十八年江撫湯通飭驗
屍與檢骨之法原有區別查洗冤錄內開踢傷腎囊陰門而死
者屍未腐時皆可檢驗是屍未腐之時原屬有傷可驗又云檢
骨一法凡傷下部之人其痕皆現于上而不在下男子之傷現
于上下牙根裏骨傷左則居右傷右則居左傷正則居中女子
之傷則又現于上脰蓋因下部受傷疼痛難忍血往上奔是以
傷現於上猶弔死之人屍潰難驗及驗兩手腕骨頭腦骨皆赤
色者是也此亦因屍難相驗故另設檢骨之法非謂驗弔死之
屍卽驗手腕頭腦等骨也由此類推則驗屍之法不可移於檢
骨檢骨之法不可移於驗屍今龍南縣驗報賴三元踢傷賴拱
仔腎囊身死一案或驗報頂心現紅或驗報牙根血癰此皆錯
會洗冤錄驗骨之意以爲血凝於骨自必色現於外殊不知驗
屍之時屍未潰爛傷痕現露本屬易驗及至日久屍潰無傷可
驗不得不要蒸檢而下部虛怯之處受傷無骨可檢如驗上部
之牙根頂心等骨有無血癰現紅以辨受傷之真僞立法極爲
周密故止載現於牙根裏骨而不云牙根亦有血癰如謂驗屍
可與檢骨參觀並論則驗報自縊屍身亦豈必盡皆相驗手腕

頭腦等骨耶誠恐作作昧於檢驗之別裝點附會致多錯誤等因

續輯云乾隆四十年萍鄉縣民黃仕月控蘇友朋致死黃燕山焚屍滅跡一案詳稱將黃仕月呈到骨殖督同作作逐一檢驗成塊者凡三十一塊量長三四分及六七分不等色黑中空無髓餘皆碎小不成塊數查人骨非黃卽白一經火焚盡成白色今驗係黑色無髓其爲獸骨而非人骨無疑黃燕山屍身未獲其或存或亡難以懸揣等情詳經袁州府駿飭內開查洗冤錄載男子骨白婦人骨黑竝無人骨白獸骨黑之文固難以色之黑白分定人獸且屍被火焚形銷骨碎何有於髓更不便以其無髓斷非人骨究竟黃仕月所呈之骨是人骨是獸骨得自何所亟應詰明來歷以定案情否則生人既無踪跡死骨又無著落豈足以成信讞等因復經訊據作作吳仕榮供稱洗冤錄載男子骨白女人骨黑這是指不曾被火燒的若經火內燒過的骨殖仍是白色可見無分男女一經火燒骨色盡白又乾隆三十二年徐前縣任內有傅延瑞謀死張尙忠一案小的同新建縣件作曾勝開檢那屍骨是扁的橫寬堅實上年蒙案下傳驗黃仕月所呈骨殖長止三四分及七八分不等細小圓形中間有

小孔色帶灰黑與小的檢過人骨并頒發檢骨圖內格式全然不同也不是洗冤錄載火燒的顏色所以定得他是獸骨從前小的報骨殖黑色是辨他不是火燒說中空不實辨他不是人骨原分兩項說的竝不以顏色黑白分他人獸就是無髓的話也不過是形容骨殖中空不似人骨堅實的意思竝不因他無髓斷非人骨等情復經會同覆訊由府轉詳又經司駁覆審通詳批結在案

集證載檢撈獲無名屍骨多具竝零星骨殖云道光三年土田州民陸工千等毆死貴州民王景蕤等六人棄屍山洞積水中後被發覺起出髑髏十三顆竝零星骨一百餘件無從分別何具係何人之屍當於詳內聲稱因各骨多少參差碍難按圖填格當卽編列號次飭令如法蒸檢據屍親人等供稱查已死王景蕤等年若干歲竝據伴作喝報檢得某洞起出有傷髑髏七具及零星各骨第一號髑髏骨一具某處一傷斜長紫紅色有血暈係木器傷第二號髑髏一具云云各係分別填寫至第七號止又第八號頰頰骨一傷斜長青紫色有血暈係木器傷第九號某處一傷亦分別填寫至幾十號止均係生前受傷身死又檢得某洞起出無傷髑髏骨六具及零星各骨第一號髑髏骨

一具顙門上有舊瘡孔尖長五分穿透孔口光滑骨色白微灰
骨青暗色俱無血暈係生前染患疥瘡痕跡無傷第二號髑髏
骨一具右太陽右額角右眉稜骨破碎有水浸青色無傷第三
號云云第四號云云第五號髑髏骨第六號髑髏骨均碎不計
塊陳腐剝蝕無從檢驗第七號顙頰止存耳齒六個第八號血
盆骨二條無傷又檢得某洞起出有傷無傷各骨第一號云云
又某骨一節均有傷紅色骨邊黧朽不辨係何物致傷報畢遂
加親檢無異當場取結分別列冊填註並究出某洞多餘有傷
之頭顙骨二具係某人因某事致死某人棄屍該洞又訪查某
洞常有土民將病死及路斃乞丐痲瘋丟棄洞內作為墓地詢
之村老某等供俱無異並取具土田州官防及附近民人等印
甘各結附卷○拳傷及毆傷小腹癰傷骨云驗得已死黃漢祥
屍骨完全問生年若干歲仰面不致命右下巴根裏骨一點圍
圓一分紫紅色係小腹受傷現紅不致命左肋骨第三四條骨
接連一傷圍圓一寸二分紫紅色係拳傷餘無別故親驗無異
隨查葉世茂原供拳傷黃漢祥左脇並小腹左邊今檢無傷痕
當卽訊問伴作譚勝查葉世茂當日供認毆傷黃漢祥左肋左
脇並小腹左邊身死今止驗得左肋一傷那左脇與小腹左邊

並無痕跡據報下牙根裏骨有紫紅色一點係小腹受傷現紅
查洗冤錄載凡傷下部之人男子之傷現於上下牙根裏骨又
小腹受傷與腎囊傷同又抓破腎囊驗得顙門血紅上下牙齒
落等語今檢驗黃漢祥止右下牙根裏骨有紫紅色一點因何
上下牙根裏骨俱不現紅顙門亦無血紅牙齒也不脫落覆供
黃漢祥當日被葉世茂用拳打傷左肋這是有骨可檢如今已
檢出拳傷那左脇與小腹左邊係是虛怯處所皮肉消化無憑
檢驗洗冤錄也不曾開載毆傷兩脇應檢何骨故此左脇拳傷
無憑檢報那小腹受傷查洗冤錄載凡傷下部之人男子之傷
現於上下牙根裏骨傷左則居右傷右則居左原不曾指明上
下都應現紅今黃漢祥屍骨右下牙根裏骨有紫紅一點這就
是小腹受傷明驗至小腹受傷洗冤錄載有與腎囊受傷同字
樣但顙門血紅上下牙齒脫落原指係抓破腎囊疼痛難忍纔
有這樣情形黃漢祥小腹左邊係被拳毆傷非抓傷腎囊可比
故此止右下牙根裏骨有紫紅色不致顙門血紅上下牙齒脫
落等語○病後推跌致死骨云仰合面週身骨殖白色並無傷
痕頂心竝上下牙根裏骨及腰間方骨無現紅云云詰問件作
現據某供認手推某右臂膊一下某側跌坐地右臂兩臂該有

傷痕爲何檢無傷痕是否震損臟腑供某原說用手勾某右臂
肘一推某側跌坐地其勢不重故此右臂膊兩臂無傷若是震
損臟腑諒有腰間方骨或可根裏骨現紅如今檢驗無痕竝未
內傷又問今檢某屍骨無傷當日被某推跌坐地如何就卽身
死又供大凡人被推跌不是震損臟腑就是氣喘痰壅俱可致
命現據屍妻某氏供說某生前患有冷症兩腿發腫船戶某又
說某被推跌坐地就氣喘不止這明係病體虛弱被推跌坐地
痰壅氣喘身死○受傷平復未久病故骨云檢得何際康髑髏
骨一具仰面致命頂心骨偏右有血瘡一綫長八分寬不及一
分微紅色不致命右手掌骨有血瘡一綫微紅色均係刀傷骨
色黃白餘無別故委係生前受傷平復後患病身死訊據伴作
某供稱何際康受傷後已隔八十五日身死係在刃傷餘限之
外查偏右係致命之處如果傷未全愈斷難延至八十五日之
久茲檢明何際康頂心偏右及左手掌骨各有血瘡一綫色僅
微紅骨亦未損原不致命實係受傷平復後旋值患病身死以
致血未散盡微有血瘡且查洗冤錄內載平日爭毆雖未平復
其痕不減色跡淺黑至死猶著等語可見骨殖血瘡最難消散
如受傷平復日久色卽淺黑今何際康受傷平復未久旋卽病

斃以故色尙微紅委係患病身死並無別故等情取具該件作甘結附卷嘉慶十五年貴縣案○傷痊病故毀傷屍骨云檢得毛有勝仰面致命頂心骨左一傷斜長一寸二分微有血瘡骨未損係刀傷頂心骨擊碎一孔碎骨脫落無存孔口左邊有裂縫一條右邊有裂縫二條孔口及裂縫俱白色無血瘡係死後傷餘無別故委係生前受傷後因病身死報畢親驗無異查頂心骨左卽屬屍格內之偏左係屬致命部位今既驗有血瘡何以又稱因病身死隨提該件作查訊據稱偏左係致命之處如果傷痕沉重斷不能延至五十四日始行斃命卽檢驗血瘡其色甚微自是傷將平復另患病症以致氣血未能消盡委係因病身死等語又查頂心孔內碎骨並未脫落棺內隨提某人查訊據稱毛有勝身死後伊主使某人將其頂心骨擊碎因有皮肉包連碎骨並未脫落當將屍身擡至空地用沙土掩蓋恐係屍身腐爛後碎骨脫落沙土之內等語當令該犯指定停屍處所飭差於沙土內掏獲碎骨二塊湊合孔處相符尙缺碎骨一小塊無從尋獲當場填格取結骨殖用桶裝貯交保看守嘉慶十六年羅城縣案○發痧身死誣告毆斃檢骨云仰面不致命領頰骨左有綠色一條長一寸寬六分致命左血盆骨內外有

綠色長一寸四分右肱骨內外有綠色長七分不致命右肋
三節骨有淡綠色一條長八寸寬三分第八節骨有綠色一條
斜長一寸六分寬三分俱無血癰兩手指甲兩腳趾甲俱青黃
色其餘各骨細檢並無別故委係生前發痧身死據作供稱
檢驗該屍領額等骨均屬綠色查潮地學武的人生前多服壯
藥死後骨帶綠色居多實在不是傷痕質之屍親據供某生前
曾經習武果屬吃過壯藥等語查洗冤錄載凡傷下部之人其
痕皆現於上男子之傷現於牙根裏骨等語今某所控某被某
拳毆左脇傷重致死如果屬實傷痕應現於牙根裏骨今檢驗
某牙根裏骨係淡紅色又查洗冤錄載肚腹受傷須檢腰間方
骨有四方眼者其骨必紫紅色等語查兩脇卽屬軟肋與肚腹
相近又恐現於腰間方骨復檢驗某腰間方骨係屬白色並無
痕跡其非脇下受傷無疑再原驗該屍右眼胞脊背有傷痕今
檢右眼眶脊背等六節皆屬白色隨訊據作供稱原報右眼
胞上下傷痕一條長止三分寬止半分皮微破係屬指甲抓傷
脊背一傷僅止黃豆大淡紅色係磕傷兩處傷痕皆係浮面輕
微皮肉消爛故此檢無傷痕等語當場填格取結○氣閉云驗
得蔣梁氏屍骨除咽喉骨腐爛餘骨完全量長四尺三寸仰面

致命顙門骨浮出腦壳骨縫外少許淡紅色係絕呼吸氣血上湧所致合面不致命右肋骨由上數下第一條第二條相連一傷圍圍七分不整有血暈骨斷係石塊傷餘無別故委係生前受傷氣閉身死

滴血三則

集證附逾期生產云胎產自古不一如黃帝二十四月而生漢昭帝十四月唐高祖十三月俱載經史又十月懷胎經常之理若血氣不調或先期欲產或過期不產如有哀樂不節又鬱怒傷肝胎失所養不能驟長有遲至三四年而後生者備載本草綱目及醫書○雍正十三年刑部議駁蘭撫題王奇因伊妻楊氏十三個月生女疑係姦生將楊氏殺死一案查洗冤錄滴血勘驗是否父子之例歷年通行應將此女與王奇滴血如係王奇所生則王奇難免殺妻之罪否則應另緝姦夫着另委賢員勘驗確實具題○檢推溺身死骨殖被水浸爛殘缺不全並令屍子滴血辨認云前詣該處據劉谷切指出埋屍處所查看坎堆業已被冰冲刷僅存形跡刨去浮土查驗屍已腐爛無憑相驗詳明啟檢飭令將屍骨逐一檢查查點仰面頂心骨顙門骨兩

額角骨俱爛缺上下牙齒共有二十三個頷頰骨兩顙頰骨兩
耳竅俱爛缺喉結喉骨腐爛無存兩膝蓋骨兩足踝兩足外
踝兩腿骨俱爛缺左腳掌骨跌骨三塊腐爛無存右腳掌骨跌
骨爛缺合面腦後骨腐爛無存乘枕骨兩耳根骨俱爛缺兩髀
骨腐爛無存方骨尾蛆骨俱爛缺餘骨俱全查訊劉谷切供稱
當日伊與王南一將彭茂林屍身掩埋未開深塋該處係屬河
岸江水不時長發水浸已及兩載是以骨殖多有爛缺等語當
飭如法蒸檢據彭金氏供報已死彭茂林生年三十八歲據作
作侯紹喏報驗得爛體一具用熱水灌入腦門有細泥沙從骨
孔中流出餘俱無故實係溺水身死報畢親驗無異復令屍子
彭狗兒刺血滴入頭骨及後腿骨上均沁入骨內其為實係彭
茂林屍骨無疑將劉谷切等按擬詳題經部照覆嘉慶十六年
湖南永定縣案

檢地三則

集證載檢地云查人命全以屍傷為憑今某屍已燒燬無從檢驗
應照洗冤錄檢地以憑定擬隨於某年月日天氣晴明帶同吏

件製備金漆桌胡麻糟醋等物前往該處地方喚集屍親人証指出燒屍處所飭令作檢有被燒殘零骨六十八件色俱焦黑且皆細小不能洗檢對眾如法檢地燒令極熱撒上胡麻掃平迨油沁入地已具人形其偏左受傷之處胡麻結聚沾戀其餘各處毫不戀結隨將偏左所戀之胡麻掃去猛火再燒潑以糟水又燒極熱烹以膏醋急以新金漆桌覆上少頃取驗桌面全具人形據作某喝報驗得死某問年若干歲屍形量長四尺五寸仰面偏左一傷斜長一寸四分寬五分其餘各處並無痕跡委係生前受傷身死親驗無異常場填格取結檢存燒殘碎骨封交屍屬收領○燒死二人檢地云遵奉檄委前赴永興縣密帶件作并集犯証前詣焚屍處所令僧太和並江令侯指出燒屍地面照依洗冤錄內開如法燒檢將草芟盡多用柴薪燒地極熱掃去餘火遍撒胡麻有頃用帚輕掃現出排立人形兩個一左一右左影上數寸右影略下數寸俱頭東脚西其左屍影胡麻於頭上連右耳根並右脇左脚等處結聚右屍影惟額顙有胡麻結聚其餘胡麻一掃落盡並無粘戀惟有傷之處連結不散胡麻之油沁入土內竟成人形而傷處油跡更多麻油之跡映於土地其分寸方圓模糊不甚明白顏色亦難辨認

復將燒熟之地潑以清水膏醋又用明亮漆桌覆蓋逾時取驗
亦內有燥映人形二個其傷亦與地上結聚胡麻之處相符當
將左屍傷痕驗量額顙接連左耳根一傷斜長三十餘寬約一
寸餘右後脇一傷長約二寸寬約一寸餘左腳一傷斜長約二
寸餘寬約七分右屍傷影頭顙一傷斜長二寸五分寬約一寸
餘無別故○燒屍滅跡將地翻犁注水不能檢地云勘得何孔
耕住處山僻門外空坪一塊坪邊有田數丘內有一坵田土翻
犁堵水在內據何孔耕指稱卽係燒屍之處田邊有港一道水
深三尺許勘畢隨飭何孔耕指出棄骨處所眼同撈獲零碎骨
六十五塊均難分辨部位內有手指尖骨二節牙齒三個係屬
明顯可辨隨飭封固標記復令將田水車乾涸出淤泥查驗並
無形跡據作作劉才回稱何孔耕屍身係在乾田燒毀今何孔
耕將田土翻犁堵水現雖車涸現出淤泥檢地不能成具人形
無憑驗出傷痕等語並飭在於何孔耕家起獲行凶木扁担一
根驗有血跡復查洗冤錄內將人打死燒燬棄擲無骨可檢載
有檢地一法今何孔耕將何孔樹致死燒燬滅跡其燒屍之處
原係乾田復經翻犁注水檢地不能成具人形無傷可檢惟於
田邊港內撈獲零碎骨內有手指尖骨二節牙齒三個係屬明

顯可辨其爲何孔樹殘骨無疑並據犯媳何小劉氏指証確鑿
即可據供定案將何孔澣按律定擬題准部覆道光三年湖南
零陵縣案

手足他物傷七則

口授編載檢驗鎗傷一屍攤列全骨查其左間肋骨衝左頭腦骨
俱有紅赤色潤一寸八分許其右間肋骨至頭腦骨與週身骨
殖如糙米黃白色毫無點許紅赤色定爲鎗傷左肋死果然
集證附刃傷風毒內蘊並不潰爛燥起白痂延至一月身死云嘉
慶三年鄱陽縣民計家回戩傷胞兄計又祥身死詰問作計
又祥所受之傷已經透膜其死應速何以七月初五日受傷至
八月初二日始行身死傷口何以並不潰爛據稱比傷雖已透
膜但透入不多左肋並非致命部位所以受傷雖重不致速死
至破口傷痕若風毒內蘊傷口燥起白痂因洗藥錄並未載有
傷口起痂之說故未喝報又詰醫生計又祥果係因傷身死何
以傷口並不潰爛據稱查醫宗金鑑開載破口傷痕風毒內蘊
不發於外燥起白痂計又祥所受傷痕實因毒氣內蘊所以傷

口不卽潰爛○搥斷頭頸骨身死云驗得不致命項頸一傷紅腫按捺骨斷頭向左偏係用兩手搥頭搥傷身死○火鎗烙傷云仰面不致命左右胸臑均有火烙傷痕致命小腹接連兩傷均圍圓八分深透內焦黑色係燒紅鐵鉗戳傷○鎗裂鐵飛炸傷身死云仰面左腮脰有火燒焦疤痕不致命食氣嚥一傷斜長九分寬五分氣嚥已斷深透內皮肉焦赤色不致命兩胎膊十指均有燒焦疤痕致命右乳上一傷斜圓不整紅色血瘡係木鎗柄撞傷餘無別故委係生前鎗裂鐵飛炸傷身死係鬱林州陳忠章案○火礮傷人越二百八十餘日仍因本傷潰爛身死云驗得已死步飛年若干歲仰面致命小腹鎗子傷一處圍圓三分平復腎囊下潰爛窟窿四個一個圍圓五分三個俱圍圓二分血污透內不致命左腿鎗子傷二處均圍圓一分平復合面致命右腰眼鎗子傷一處潰爛圍圓一寸一分透內餘無別故委係因傷潰爛身死飭取鉛子與傷處比對相符訊因步飛被社光先用烏鎗放傷後因傷處內潰由穀道前爛出鉛子調治無效所以延至二百八十餘日仍因本傷潰爛頰命題結有案係道光六年直隸大名縣案○自咬舌尖身死云驗得仰面面色黃兩眼開口開有血水流出口舌尖咬斷五分左邊略帶

未斷傷處捲縮有齒痕舌根腫脹閉塞咽喉委係生前自咬舌尖身死

踢傷致死四則

集證註云直隸獻縣娼妓翠姑自十六歲當娼至十八歲身死當娼二年閱人多矣其羞恥骨並無青黑據老伴作王升供稱洗冤錄所論亦不甚確大概未生育者其骨潔白生育多則血氣耗其色昏暗翠姑雖當娼二年但正在青年尚未生育故其骨白色○又載木高底鞋踢傷云左膀一傷圍圓三寸八分紅腫三角樣係脚穿木高底鞋踢傷右脇一傷橫長一寸五分寬五分紫黯色有血瘡係鞋頭踢傷起出鞋隻比對相符○赤脚踢傷云致命腎囊一傷長二寸寬五分紫紅色血瘡有趾痕係赤脚踢傷凡赤脚踢傷大槩係橫長其長一寸二分一寸五分至二寸餘不等寬五分七分不等顏色紫紅紫黯不等俱血瘡有趾痕亦間有無趾痕者○木棍頭戳傷腎囊云致命左額角一傷圍圓一寸二分紫赤色有血瘡係木棍頭戳傷牙齒咬緊右牙根紫紅色致命左腎囊一傷浮腫圍圓一寸一分紫紅色有血瘡木棍頭戳傷兩腎子全

殺傷二則

辨正云被快利物傷死者今作被快物傷死者案快利物卽上刀斧鎗等物但言快而不言利此近代俗語耳不可施之於文句
○腦角後今作腦骨後案前身骨條但云印堂上者腦角腦角下者承枕骨並無腦骨之名讀律佩觿云腦角係致命最要之地如傷重則立可致人於死今以角爲骨若誤作他處遺害非輕

殺傷辨生前死後十三則

附考云洗冤彙編載民有利姪之富者醉而夜殺之于家其男與妻相惡欲借姦名併除之乃操刃入室斬婦首并割取醉殺者之首以報官知縣尹見心於燈下視一首皮肉上縊一首不然卽詰之曰兩人是一時殺否荅曰然曰婦有子女乎曰有一女方數歲見心曰汝且寄獄俟旦詢之隨取其女至衙好言細問竟得其情父子俯首伏罪○乾隆四年刑部駁甯古塔將軍題王氏騎壓張繼盛身上刀割頸項并砍傷腦後身死查張繼盛旣被騎壓仰面頸項被割氣噪已斷自不能展動又何至砍傷

合面腦後深亦至骨其中不無同謀加功之人○乾隆十二年刑部駁湖廣鍾祥縣民劉曾刃傷瞽目朱成如身死查鐮刀非禦替之具架格豈有抵骨之傷今驗腦後耳根腮脰等處破口三條傷皆見骨明係有心砍死謂其順手攔格無意撞傷其誰信之○乾隆十五年刑部駁山東省民權成羣砍傷陳香身死查原驗傷痕深至五分自應骨損非輕傷可比據東撫準覆稱訊據仵作供陳香偏左一傷相驗時原係周圍浮腫彼時因浮腫與深難以分別是以連浮腫一總驗量遂有深至五分之數若除浮腫分數其本來受傷原屬輕淺不至於死倘若損骨其骨必露當日驗無骨露形狀與屍格相符○乾隆十五年刑部駁山西孝義縣民婦周程氏砍傷魏甲則身死查菜刀非他物可比而右額角又係致命之地且深至骨其為傷重無疑該撫以額角原係皮骨相連皮破自卽至骨遂以見骨為輕傷殊不知人命案內凡屬頭上被毆豈必深皆見骨正有傷未見骨亦足殞命乃係致命處被傷也至於皮開骨露卽不中風亦難保其不至於死○乾隆十七年刑部駁直隸東光縣民咸一正扭住汪合義髮辮被汪合義反手連砍身死查扭住髮辮一經刀砍自必負痛釋手必無任其盡砍多傷仍行扭結之理若果抵

死扯住髮辮又何以並無掀起傷痕所云反手向砍不期致命之處殊難憑信

附記云錄內所論殺傷各情形幾於窮至事物之理無處不到矣大抵驗屍雖以本傷爲憑但其生前被傷之情形自有確切證據必須細心體認得真方敢信爲謀故身死若以傷狀相符供證畫一猶落第二乘矣醫家診病以望聞問切爲要義驗傷亦然自非設身處地詳慎折獄者正未易語此也

集證載死後加傷云仰面面色黃兩眼合口合致命頂心連顙門一傷直長三寸寬三分深至骨顙門骨破頂心傷口皮捲縮有血污係生前傷顙門傷口皮不緊縮無血癰骨破處色白係死後砍傷通身肉色痿黃形體羸瘦兩手微握肚腹低陷合面穀道腫突有糞污委係生前受傷○被人扎死狡供自戕節次委員檢明確係被殺云道光五年直隸東明縣有山東荷澤縣兵役赴東明縣查拏要犯致將民人李庚扎傷斃命一案報縣驗得仰面面色黃兩眼胞閉口微開不致命右肱腋刃傷一處長四分寬二分深一分皮開肉綻兩手微握致命肚腹刃扎傷三處兩處均斜長五分寬深均二分一處斜長四分上寬不及一分下寬一分深一分俱皮破肉綻又相連刃扎傷二處俱斜長

一寸寬三分俱深透內腸子流出合面致命脊背劃傷一處長二寸一分寬一分皮破血凝委係被扎身死經東省屢提兵役研訊僉稱李庚實係自戕身死與東明縣原驗兩歧由山東撫院派委兗沂曹李道曹州王守馳抵東明會同開驗李庚屍身尙未腐爛間有發變兩胎膊兩手因春氣發動屍軀鬆軟兩胎膊可拉之使直亦可彎之使曲兩手捏之即可拳握釋手卽微握其餘刃扎傷痕核與東明原驗相符飭取荷澤縣解來凶刀比對傷痕均不符合兗沂曹李道以李庚肚腹連受七傷兩手自應護痛今兩手無傷似非被扎執定自戕身死卽經東明縣稟蒙移知山東撫院改委新任兗沂曹楊道會同直隸通永李道覆訊因查原呈之李庚自戕凶刀一把刃寬七分背濶一分如用此刀直扎透內則傷口寬長必與刀刃分寸吻合今核屍圖填註肚腹腸出兩傷俱斜長一寸俱寬三分傷仗迴不相符且二傷俱係上尖下圓直長相竝查驗起獲兵役各器械比對圖註傷痕內有二齒手鉤兩把係荷澤縣差役張得與馬得山分執之物內馬得山原執鐵鉤一把核對肚腹腸出兩傷分寸適相符合究出李庚實被馬得山用雙齒鐵鉤鉤傷並非自戕弔查歷年讎過被扎身死舊案亦間有眼閉口開之狀其兩胎

勝可世可伸係因死逾兩月時交春令週身鬆軟所致旋將馬
得山等擬議奏結○驗生前砍下頭顱竝死後砍傷殺姦云勘
得某處住屋一間坐西向東屋內用竹排隔開兩截後截係臥
房某與某氏二屍俱在臥房牀前牀邊及地下有血跡左鄰某
右鄰某勘畢繪圖附卷隨令伴作將屍擡出平明地面脫去上
身藍布短衫一件下身不穿褲如法相驗據伴作某喝報驗得
已死某將首級湊合屍腔長四尺八寸項頸週圍皮捲骨凸血
污係生前用刀割下驗得已死某氏將首級湊合云云致命胸
膛連心坎一傷直長八寸寬六分骨裂皮肉不捲縮無血瘀係
死後砍傷又驗頭顱連身屍量長三尺五寸一驗添頭髮散亂
四字將頭顱湊合項頸一傷痕跡相符致命咽喉連項頸俱斷
圍寬七寸皮肉捲縮骨凸有血污係刀傷又頭顱連屍身湊合
痕跡相符仰面致命咽喉連項頸割斷傷口齊皮不緊縮無血
瘀白色係死後砍傷又驗得頭顱一顆目開項頸縮皮肉有血
汚屍身頸骨凸出筋縮皮捲有血污兩肩聳皺一驗生前砍頭
腔有小孔死後則無○挑刀砍缺云致命偏右兩傷前一傷橫
長一寸寬二分皮破骨損骨口嵌有刀口鐵片一小塊後一傷
斜長六分寬一分皮破骨損均係挑刀砍傷起出凶器長柄挑

刀一把查驗刀口缺一小塊將偏右所嵌刀口缺片取出湊合比對傷痕相符○鑷刀砍傷云頂心偏左一傷斜長二寸二分寬二分起刀處深透內損骨收刀處見骨血污皮肉捲縮紫紅色係鑷刀砍傷○剪刀戳傷云致命咽喉下有一傷處有血污斜長三分寬一分深透內係剪刀戳傷

自殘六則

集證載原驗自戕屍親執為被殺檢明定案云已死李光曾問年若干歲驗得仰面面色黃兩眼閉上下牙齒咬緊口微開致命咽喉下刀傷一處自右耳後起至咽喉斜長一寸四分寬一分皮肉開深透食氣纔起手處重收手處輕食氣斷左胎膊軟可以彎曲與咽喉平右胎膊硬直不能彎曲係左手持刀自刎身死與洗冤錄所載自戕情形相符訊明李光曾因患瘋迷病症自刎咽喉殞命惟屍父李鉞據稱被黃寶樹雞姦不遂殺死赴京控告行提屍棺來省委員開棺驗視李光曾屍身皮肉消化骸骨顯露因左手皮肉腐化小指脫落李鉞口稱小指被刀削去必係黃寶樹用刀砍李光曾咽喉李光曾用左手迎護致

被割落即可將黃寶樹治罪不肯蒸檢委員細加查驗實係腐爛脫落並非刀削筋令指定傷痕具結復從棺內檢出李光曾左右手十指骨節俱全並非短少亦無刀砍痕跡又檢看咽喉骨腐爛無存隨令作如法蒸檢週身骨殖俱黃白色毫無傷痕旋將李鉞照誣告律治罪奏結道光三年直隸開州案○婦女金刃致命三傷驗明確係自戕因屍父赴京呈控辨論定案云驗得李陳氏問年若干歲仰面面色黃兩眼胞閉口微開致命咽喉下扎傷一處斜長六分寬一分深透內紫紅色致命心坎肚腹正中扎傷一處正長六分寬一分深透膜堅硬有孕兩腿伸竝無別故委係自行扎傷身死筋取小刀比對各傷相符竝將該屍左手比試可以彎曲至傷處填註圖格詰訊屍翁李本立等堅稱陳氏實係自行扎死屍父陳大訓執稱陳氏被人謀害控經都察院咨回提省委據保定府因洗冤錄載生前以刀自割身死其屍口眼俱合兩手拳握註云死人用手把定刃物以作力勢其手自然拳握又自刎之情各殊口眼亦當微辨如係氣鬱而刎者眼雖閉而不緊口微張緣其氣懣終於不舒故也又自刎死者如用右手執刀自刎則右手軟死後一二日內右手可彎曲左手直不能彎曲左手執刀自刎亦然等語今

查核原驗陳氏屍格兩眼閉口微開其咽喉下一傷尙屬輕淺心坎肚腹二傷俱已透內其爲先扎咽喉後戕心坎肚腹無疑訊據陳氏夫李三錫供稱該氏生前做活習用左手而該屍左手又能彎曲至傷處核與洗冤錄載自戕情節相符實訊屍父陳大訓亦無別詞覆奏完結道光五年萬全縣案○刃扎致命肚腹透膜腸出又將莖物割去半截節次審明確係自戕云驗得已死趙青峯問年若干歲仰面面色潰爛兩眼胞閉口閉左手直伸不能彎曲右手軟可以彎曲致命肚腹近右刃傷一處斜長一寸二分寬二分深透膜腸出皮肉捲縮不致命莖物割去半截圍圓一寸七分兩腿伸餘無別故委係自行扎傷身死飭取小刀比對屍傷相符訊明趙青峯係在豐潤縣爲山西人王汝勛開設臨裕當內作夥被鋪夥杜楊浩出言穢辱氣忿自戕身死屍妻趙師氏總稱伊夫趙青峯係被杜楊浩父子謀害惟原驗趙青峯右手彎曲確係自戕本無疑竇因旣剖何以復扎情節疑似節次委員會審一載有餘逐層推求不遺餘力檢核洗冤錄竝無自行扎割致傷與被人扎傷其傷口有何區別之處是此案開檢既不足憑全憑供證定讞歷訊案內眾供僉稱趙青峯扎由自戕竝無別情而屍妻趙師氏堅稱旣扎其腹

何能復割腎華顯係被人謀害不肯輸服控經都察院咨四提
省審辦復又根究再四委因杜楊浩與趙青峯均在王汝助所
開臨裕當舖充當舖夥杜楊浩在當舖借錢文月立字號放賬
生息趙青峯恐財東算賬至舖勸令歇業不允與之爭吵並以
趙青峯曾經長支鋪錢及借錢娶妻之言窘辱因而先割莖物
欲令杜楊浩開門圖賴後因杜楊浩不肯開門立逼算賬復又
白扎肚腹殞命眾證確鑿案無疑義卽照眾證明白之例按例
擬罪嘉慶二十二年直隸豐潤縣案○刎傷深長駁頂云衡山
縣原驗劉澤南仰面面色發變兩眼胞開兩眼睛上視上下牙
齒緊閉口開致命咽喉上有傷一處皮破卷縮寬一寸橫長四
寸二分深一寸七分食氣喉俱斷左手握右手散係左手持剃
頭刀自刎院批查洗冤錄載用小刀割咽喉死者只長一寸五
分至二寸兩手拳握今劉澤南用剃頭小刀自刎身死據驗傷
痕寬一寸橫長四寸二分深一寸七分右手散其左右傷痕深
淺又未詳晰驗明不便草率覆詳查洗冤錄載自刎死者如用
右手執刀自刎則右手彎曲左手執刀自刎亦然若係別人執
刀戳死者左右手皆直不能彎曲等語今驗明劉澤南係左手
持刀自刎身死是以左手握右手散核與洗冤錄載自刎情形

相符並訊據仵作某供稱劉澤南係用左手持刀由右耳根後割至左邊必係當時將頭向右旋轉況剃刀鋒利非別項小刀可比死者急欲自盡下手勢重以致傷寬一寸橫長四寸二分深一寸七分食氣噪俱斷當時身死且驗明右邊起手深左邊收手淺兩眼睛上視耳關緊閉口開實係生前自刎身死等情所供似屬情理核與原驗無異至左右傷痕深淺係經書某漏未入詳已將該書責懲覆批以剃刀鋒薄氣噪在右既用左手自割卽傷右邊氣噪自必負痛漸縮何能傷寬一寸長四寸二分與洗冤錄載用小刀自割分寸不符再詳查洗冤錄載若用左手刃必起自右耳後過喉一二寸又載右手最活稍痛卽知而力軟非若左手力勁非至極痛不能知覺是左右持刀自刎原有上下輕重之分今劉澤南係用左手持刀由右耳後割至左邊因上下皮肉捲縮從捲縮處量起故傷寬一寸至剃刀鋒刃雖薄究比別項小刀鋒利死者急欲自盡左手勢重原係頃刻之事況左手力勁非比右手活動稍痛卽知故起手一割不覺疼痛漸縮以致由右至左橫長四寸二分等因完結○白刎云仰面兩眼微開口閉咽喉上一傷橫長三寸五分深透內右深左淺食氣噪並斷皮肉捲縮有血汚係刀傷左手軟可彎曲

右手直餘無別故委係生前用刀自抹咽喉身死又驗得仰面
兩眼微開口開咽喉右一傷斜長一寸六分又一傷斜長二寸
皮俱微破咽喉上一傷橫長三寸五分深透內右深左淺食氣
嚙並斷皮肉捲縮有血污係刀傷左手軟可彎曲右手直合面
右臂膊一傷斜長二寸寬四分紫紅色又平排二傷各橫長二
寸各寬三分紫紅色右後肋一傷斜長一寸六分青色均係木
器傷餘無別故委係生前被毆後用刀自抹咽喉身死後奉司
駁以洗冤錄載自刎只能一傷等語頂覆此案係用剃刀自刎
柄上連及刀口之處有鉗口鐵皮一片兩面俱已開裂咽喉右
平排兩傷係柄上鐵片帶傷以故微破粗皮不成傷痕○白殘
云仰面致命頂心連偏右一傷斜長一寸三分寬二分深至骨
致命顙門一傷斜長一寸三分寬二分深至骨俱皮肉捲縮有
血污均係刀傷眼口俱合身關緊右手拳握左手垂下委係生
前自砍致命身死用刀自扎身死屍首兩目緊閉如被人所扎
兩日間張兩手散直係嘉慶十二年都
察院奏山東民初樂善進控案內抄出

自縊八則

集證監犯墜鍊身死云嘉慶十七年營林州監犯陳中典案遵卽帶領刑件馳詣鬱林監勘得監房東西兩邊各一座內上下各設木柵欄一個該犯在東邊下一間木柵外頸帶鐵鍊扭鍊完全柵內鋪有板牀板上有糞污板離地一尺三寸離柵口一尺二寸柵欄兩旁各有橫檔一根自橫檔至板牀量高三尺一寸據禁卒供稱該犯出恭回柵伊將鐵鍊搭繞右邊橫檔上該犯帶鍊撲跌板外離地等語勘畢飭將屍身移放平地脫除鐵鍊扭鍊并原穿紅衣褲眼同屍親人等如法相驗據件作某喝報驗得監犯某左面刺兇犯二字仰面致命咽喉鍊痕一道長九寸三分寬四分入字不交紅色穀道糞污委係患病墜鍊身死將鐵鍊比對墜痕相符○用鐵鍊拴在棹腳自縊云查勘自縊處所於某處案棹在左邊腳下棹腳量高二尺七寸棹面寬二尺二寸某係用鐵鍊拴繫案棹近座棹腳懸過棹面垂掛自縊懸掛處離棹面長九寸該屍頸頭倒臥在地左腳直伸右腳盤坐鐵鍊旋轉頸後取杖輕敲鐵鍊緊直不鬆助畢驗得仰面面色紫赤兩眼合口開舌抵齒不出致命咽喉鍊痕一道長九寸五分寬三分深一分從兩耳後直上髮際八字不交血瘡紫紅色兩手握餘無別故委係自縊身死○樹上自縊云勘得松木

嶺離大甯墟約里許該屍仰臥樹下據李自達指稱李勝卽在
松樹下用布帶縊死伊等見解放等語隨飭如法相驗驗得仰
面而色發變兩眼閉口開舌出齒三分咽喉下有縊痕一道橫
長九寸寬五分深一分紫赤色有血痕斜入兩耳後直上髮際
入字不交兩手握大拇指垂下肚腹墜兩腳直腳尖垂下委係
生前自縊身死報畢親驗無異飭將縊帶比對縊痕相符填格
取結屍斂棺殮縊帶帶回貯庫○門環側吊自縊云勘得唐長
古房門兩扇上扇釘有鐵環離地三尺鐵環上套有鎖一把據
唐長古指稱唐亥龍用自己繫襪藤繩兩根接長繩頭拴住鎖
上用繩套頭縊死頭面向外左膝跪地側臥藤繩約三尺業經
燒燬等情勘畢隨詣屍所荒坪一塊離唐長古家約兩箭遠驗
得面色紫赤兩眼合口閉舌抵齒不出咽喉上有藤繩痕一條
長七寸五分寬二分深半分紫赤色斜入左耳邊八字不交係
生前自縊傷兩拳縮肚腹兩腿俱紫黑色穀道糞出○患扣頸
傷寒自縊身死云勘得陽義高店房三間中係堂屋堂屋右邊
有木梯一座樓上空房一間木牀一架鋪有草蓆屍已解下據
陽義高稱游月雀川布褲帶縊於橫枋上兩膝跪在樓板上自
縊板至枋量高四尺二寸枋上灰塵滾亂勘畢將屍如法相驗

據件作喝報驗得仰面面色發變眼閉脣微開舌抵齒致命咽
喉上有縊痕一道圍繞至右耳邊微上髮際量長八寸二分入
字不交痕寬散漫係布帶自縊痕兩手微握兩大拇指垂肚腹
墜下合面十指甲赤色殺道糞出實係患扣頸傷寒自縊身死
道光五年湖南新化縣案○跪審後自縊骨云檢得覃丕顯髑
體骨一具仰面致命頂心顙門額顙骨均淡紅色不致命上齒
有九個紅色不致命兩頰車骨微有血瘡噪喉結喉骨腐不可
檢不致命左手腕骨內有五塊微有血瘡右手腕骨內有四塊
微有血瘡不致命十指尖骨赤色有血瘡不致命左膝蓋骨一
傷橫長五分寬二分紫黑色右膝蓋骨一傷橫長九分寬一分
紫黑色係跪傷不致命十指節骨俱有血瘡合面致命兩耳根
骨紫紅色有血瘡係縊痕致命項頸骨第一第二兩節微有血
瘡餘無別故係生前自縊身死據件作某指稱檢驗自縊骸骨
洗冤錄內載明兩手腕並頭腦骨皆赤色現檢情形正與洗冤
錄所載相符至自縊時氣閉血湧是以頂心等骨及上齒均有
紅色與腎囊受傷血凝上下牙根骨裏者不同委係自縊身死
原驗覃丕顯咽喉下有縊痕一道橫長一尺零二分寬二分紫
黑色有血瘡斜入兩耳後髮際入字不交兩手微握大拇指垂

下肚腹墜下兩膝益紅腫係晚傷兩腋則微紅色兩腳直腳尖垂下合面兩腳腿肚微紅色係晚後血氣下垂所致嘉慶十六

年內貴縣案

續輯載檢自縊屍骨兩手腕骨十指骨中節俱赤色頭腦骨十指尖骨俱無痕跡云乾隆四十七年峽江縣鄧香妹自縊身死一案檢驗兩手腕骨十指骨中節俱赤色詰問作何以致頭腦骨十指尖骨並無痕跡據供洗冤錄載頭腦牙齒手腕十指尖各骨有赤色但自縊套縊繩不一懸掛久暫不同若死者縊繩套在喉上牙關咬緊那氣血上升頂心腦骨牙齒就有血凝注故有赤色如繩套在喉下口開牙關不緊上頭不用力那氣血往下墜頭腦牙齒各骨都不能赤色丁那指尖骨沒有赤色這是懸掛不久即經人解下血氣還行不到指尖所以祇有十指中節赤色將鄧陳氏依不應重杖詳結在案○檢驗死骨頭腦牙齒手腕各骨均無痕跡耳根骨有帶痕十指尖骨紅色云乾隆五十七年會昌縣曾連清被劉洪光毆傷後自縊身死一案檢驗兩手十指尖骨血癰紅色兩耳根骨各有帶痕一道皆血癰紅色詰問作何頭腦骨手腕骨耳根骨牙齒何以並不紅色與洗冤錄所載縊死情形因何不符據供推原錄載之意因縊死

情形有不同見得傷痕不現於彼即現於此故詳載以備考並非檢驗自縊屍骨必如錄載各傷盡有傷痕纔可定案況是否自縊全以耳根有無痕跡爲憑今曾連清手腕骨頭腦骨及牙齒雖未赤色而兩耳根骨已有帶痕十指尖骨又都紅色就是縊死的確據了等情將劉洪
光照威逼問擬詳結在案

被毆勒死假作自縊二十一則

附攷云乾隆十五年刑部駁湖廣崇陽縣民饒仙林勒趙相身死如果趙相以被毆懷忿自解綁袋拴於項上跑進饒仙林門內饒仙林既已執其胸前纏袋力往外拉則趙相勢必氣緊難支豈能轉身反向內掙即其向內屬實而以不肯外出之人猛拉使出則喉間之纏袋着實而項後之纏袋寬鬆何以死後袋痕周圍交匝與被人勒死無異况纏袋拴於項上若係死扣倉猝一拉氣閉尙屬可解今既稱係活扣其扣自必虛鬆一經手拉何至登時氣絕而臥跌倒地又何以並無磕碰傷痕恐有謀故別情不便率結
續輯云疑難雜說門內有用物搭口鼻及掩扼殺并用手巾布袋

之類絞殺其面色或青黯或一邊似腫情狀不一但項上肉必硬再看手足有無細縛痕舌上有無咬破痕二便有無腫痕口內有無涎唾喉間腫與不腫如有涎及腫或是酒醉卒死宜參看○又有用木棍壓咽喉致死者其傷中間潤左右微尖長不過二寸○昔有海陵民因病輕生用繩白勒頸項以筆管插入套中絞緊將筆管頭捺於領額以致殞命幸死於諸工寓所眾供如一案無可疑一詳完結眾人供稱是晚同室坐臥者六人初聞死者云如此惡病不如速死因用繩自纏其頸笑問眾人曰如此得死否既又用筆管插入曰如此可以死矣眾人以為作耍不向阻止少頃無聲視之已死矣○原驗自縊身死委員覆檢係毆傷後被人拉勒致死假裝自縊并婦人骨殖與部額骨格多寡不符錄以備考原驗已死楊蘇氏問年二十一歲驗得仰面致命額顱不致命右眉相連右眼胞并有腮頰拳傷各一處微腫紅色致命咽喉上溢痕一道斜入腦後八字不交紫紅色十指肚血墜餘無別故委係自縊身死填格通詳後經縣訪得蘇氏出殯時墳前演戲數日物議沸騰難保無另有致死別情稟請委員會審據屍翁楊綬章工人王來意兒供出蘇氏係被伊姑田氏夫次妻魏氏毆勒致斃又起有血衣其為並非

自縊無疑必須檢驗定案稟由臬司督同道府大員於嘉慶二十二年五月十六七八等日前赴蘇氏埋葬處所起出屍棺如法蒸檢檢得蘇氏骨殖致命顙門骨浮出腦殼骨縫之外少許微紅色內有血絲三點額顙骨正中傷一處紅色血暈左傷一處紅色血暈右眼眶骨傷一處微紅色血暈不致命右眉稜骨傷處微紅色血暈右眼眶骨傷一處微紅色血暈上齒十五個脫落一個下齒十二個脫落十個俱黃白色致命喉結喉骨腐爛無存不致命兩髀骨存骨格原註婦人無今檢驗有兩手掌骨原註十塊該氏生就入塊兩手十指骨有血暈淡紅色不致命兩肱骨存原註婦人無今該氏有合面致命兩耳根骨并不致命項頸骨第一節至第五節均無故兩肋骨共二十四條註云即斂骨婦人多四條該氏生就共止二十條湊對筭竅相符左肋第二條有紅暈其餘上下骨殖俱白色委係生前毆傷後被人拉勒致死假裝自縊究出蘇氏之姑楊田氏因與工人王來意兒通姦被媳蘇氏撞見誘令同陷邪淫不允并被當場搗破姦私起意商同王來意兒致死取出麻繩一根擲於炕上田氏在蘇氏前面將兩手攢住即令王來意兒與伊子次妻魏氏一齊幫同下手魏氏因與蘇氏平日有嫌亦聽從取繩跼立蘇氏背後

將繩套住蘇氏咽喉王來意兒在魏氏右邊身旁用手攔住蘇氏兩肩勝往前儘力向非並用右幾頂住蘇氏身後魏氏將繩用力往後拉緊逾時蘇氏卽不能動彈田氏順勢一推蘇氏身軀項帶麻繩倒跌炕下左手墊壓左肋處所手帶銀鐲以致墊傷左肋第二條頭而貼地口內噴血立時殞命將楊田氏等分別擬議奏結嘉慶二十年直隸清苑縣案。勒死骨云驗得已死王有屍屍骨除咽喉骨腐爛餘骨完全問生年三十五歲屍骨量長四尺九寸仰面致命顙門骨浮出腦殼骨縫外少許淡紅色係鬚絕呼吸氣血上湧所致合面致命項頸第一節并不致命第二節有繩痕一道長一寸二分寬一分半紫紅色有血暈係繩勒傷餘無別故委係生前被勒身死又檢得成粵乾爛骸一具查生年若干歲仰面致命顙門骨一傷圍圓一寸二分淡紅色有血暈喉結喉骨久已腐爛合面致命項頸骨第一節接連不致命第二節骨紫黯色有血瘡均係勒傷此條卽係道光元年十一月內興業縣詳檢成觀陵勒死伊姪成粵乾案。按勒咽喉身死骨云驗得已死林氏仰面不致命左右頤額骨十指尖骨十趾尖骨俱白色無血暈合面致命腦後骨左右兩耳根骨俱白色無繩痕不致命項頸骨第三節裏面一傷橫

長五分寬三分紫紅色有血暈尾蛆骨白色無血暈其餘週身上下骨殖俱白色並無別故委係生前按勒咽喉身死又原驗林氏致命咽喉一傷橫長三寸九分寬四分紫紅色左右平過無八字痕形合面髻散漫不致命項頸一傷圍圓二寸八分皮微損痕色不整係墊際傷○指傷跌髻捏報自縊檢骨云頂心骨淡紅暈牙根紅色項頸骨裹血瘡腦後骨脊背骨尾蛆骨俱有墊磕傷痕十指尖並無血瘡係指傷跌地身死乾隆五十一年湖北建始縣尹黃氏案○勒死云驗得仰面面色紫兩眼開口開舌抵齒未出致命咽喉上有繩痕一道平繞周匝繞離後頸周圍量長七寸五分寬二分深一分紫黑色合面殼道有糞污餘無別故委係被勒身死勒起棉繩一條量長二丈二尺比對勒痕相符又驗咽喉下有結痕一個圍圓一寸五分深二分血瘡紫赤色又帶痕一道圍長九寸橫纏項頸結締右耳下○以死者髮辮勒死云致命咽喉上髮辮勒痕相連二道各寬二分深一分紫赤色自右邊頸項起週圍纏勒圍長八寸五分辮痕交匝髮辮量長一尺二寸五分打辮紅繩長一尺一寸比對勒痕相符○手按咽喉致死云驗得仰面面色赤兩眼胞閉兩眼睛在內上下牙齒全口微開舌抵齒致命咽喉有按傷一

處橫長三寸五分寬五分左右有大手指抓痕一處左有二中指
相連抓痕二處血瘀紫紅色兩手微握十指微屈肚腹微脹委
係生前按傷身死據犯供因被死者扭住胸衣仰臥勸下連伊
帶壓身上死者又將伊髮辮揪住伊負痛用右手按住死者咽
喉死者揪緊不放伊情急脫又用力一按死者將手鬆放神
色改變伊速走起詎已氣閉身死乾隆五十九年安遠縣民蕭
三榮按傷小功服兄蕭萬雅身死案又致命咽喉有手指按傷
竝排三處上一處橫長九分寬四分中一處橫長一寸二分寬
四分下一處橫長六分寬四分俱血瘀紫黯色自咽喉至食氣
喉中空三寸無傷不致命食氣喉有手指按傷一處斜長六分
寬五分血瘀紫黯色○布帕縛死云驗得仰面不致命上門牙
脫落兩個牙根有血瘀係碰傷自口至髮際有橫痕一道係布
帕縛傷左手腕一傷橫長一寸一分右手腕一傷橫長一寸俱
寬三分深一分青紅色係繩細傷右臑肘一傷斜長一寸寬二
分微紅色係碰傷合面致命腰眼一傷橫長一尺寬三分深一
分青紅色係繩細縛傷不致命左腳大趾一傷圍圓一寸二分
青紅色係瘡傷○布袋揜勒咽喉致斃云仰面致命咽喉連食
氣喉一傷皮肉堅硬紫紅色橫長六寸三分係布袋壓勒身死

犯供某按住某兩腳某騎在身上掣出身帶裝米布袋放在某
項頸緊貼咽喉兩手執住布袋兩頭用力擎勒立時殞命○搭
傷咽喉又復掛吊越三日身死云石門縣覃廷璋手搭陳女咽
喉強姦越三日身死司簽以陳女既經被搭咽喉又復裝縊掛
吊何以竝不立斃越三日後始行身死復詳陳女上吊不過頃
刻卽被趕至解下故沒縊痕洗冤錄載自割喉下如三五日死
者深一寸三分食喉斷氣喉不不斷可見咽喉受傷原有三五日
始死陳女喉嚨不斷故能延隔三日等因完結○又傷云致命
咽喉一傷橫長二寸八分寬三分微紅色有血瘡係手指又傷
○手指甲搭傷云仰面面色紫黑眼開口開舌不出亦不抵齒
致命咽喉左畔指搭痕一個有血瘡咽喉右畔指甲痕三個有
血瘡俱紫紅色係手指搭傷另有繩痕在兩手腕兩腳腕○謀
弔裝縊云勘得唐大拔鋪屋一所兩間左係堂屋右係店房中
有木梯一張豎靠樓枋屍已解下頂上繫有絲帶一條交成死
結據唐大拔指稱該屍原弔木梯高處竝未踏物當將絲帶解
下按照懸掛量演查看上面繫帶處高不可攀頭緊抵上腳
懸空所踏無物竝非自縊情形勘畢驗得已死楊嫺妹頭髮散
亂面色微變兩眼開不致命左腮頰接連耳輪致命耳根有傷

一處紫紅色係掌傷口閉舌不出致命咽喉上有痕一道紫赤
色橫長九寸圍繞周匝寬三分深一分斜至右耳後有結縊痕
跡淺淡係絲帶吊傷不致命左手五指甲縫青黑色右膀有抓
傷一處長九分寬四分紅色實係生前受傷身死○懸掛致死
云乾隆五十一年湖北襄陽縣民伍發魁細縛子婦伍張氏手
足懸掛枋上致死一案驗得伍張氏面而下背向上而色紫口
鼻有血沫手足有繩痕實係身軀懸掛氣血逆行致死○勒死
無掙扎傷駁頂云乾隆三十四年河撫胡題曹江妮勒死吳氏
一案一人勒死一人手腳勢必掙扎何以驗時並無傷痕覆稱
彼時吳氏係合面在地被勒身死兩手難以舒展雖有掙扎係
在泥地是以無傷○又有乘醉乘臥勒死者亦無掙扎傷有成
案○檢骨分別勒死搭死縊死云一酒醉人合仆在地猝被勒
死口眼閉舌出項上無抓痕手不舒散死後裝吊因腳不離地
又二三日後屍已發變無弔痕可驗詰問伴作葉勝查勒死裝
縊的屍口眼開手散舌不出項上肉有指爪痕喉下另有死後
繩痕今查屍格內稱兩眼閉口半開舌出齒門三分兩手曲握
喉下項頸均無死後裝縊繩痕與勒死後裝縊情形不符是何
緣故又領額左右有繩痕一道這是怎樣勒的格內只有深濶

分寸至於長有若干未據聲說逐一供來據供勒死裝縊的洗冤錄載口眼開手散舌不出項上有指爪痕小的細想這是指好人猝被勒死而言因被害的人非醉非病一經被勒既受驚怖復抱忿不甘所以口眼均開舌不出亦不抵齒又因勒處難過兩手亂抓故項上有指爪痕及至氣纔絕兩手舒散情形原該如此今王昌世蒙審是吃得大醉的了自向尋問神氣本是昏的又被推倒合仆在地身上有人壓住氣息不能舒展王大才用繩套他項頸原說投詞他本不防勒死口裏還罵那知猝被大才狠勒喉下卽時氣閉兩手本是掙住在地急切不能伸向項上抓拏所以死後眼是閉的舌是出的項內並無抓痕手也不能舒散惟是口仍是開的洗冤錄疑難雜說條下載稱常有勒殺類乎自縊可見勒死情形也無一定可以類推至死後裝縊繩痕原不比生前的傷日久易退況王大才那日將繩套在屍項原勒處所又裝弔時屍腳著地垂下的勢不甚沉重不多時就解放地下兼之三兩日後始行報驗屍已發變故痕亦漸散無從看驗並非遺漏卽領頰繩痕一道想是大才雙股麻繩子套他項頸王昌世亂掙亂動誤將一股的繩兜住唇吻下平至左右頰頰一股套在咽喉下拉扯時兩股齊緊所以都有

傷痕至額頰傷痕驗長三寸實係從前一時漏報

溺水死四則

續輯云水溺之屍有卽日浮起水面者有逾一二日後浮起者亦有日久不浮者嘗見一人遇盜畏避失足落河淹死該處水流迅疾以爲屍隨水溜因多雇漁船自百餘里外之下游張網溯流而上竟不得屍至第七日仍於下水處撈獲或謂身上帶有黃金器物其屍不浮未審果否○一說或因與人爭毆及用力氣喘則吃水不多腹不甚脹屍亦不浮

集證溺水骨云檢得某週身骨殖並無傷痕仰面頭顱骨用熱水灌入鼻孔中有泥沙流出委係生前落水身死○毆後落水身死云仰面兩眼開口開致命額顱連右額角一傷橫長一寸八分寬一寸五分紫紅色有血癰係木器傷右腮脰一傷斜長一寸五分寬五分紫紅色有血癰係竹器傷口內有水沫流出兩耳竅鼻竅有泥沙兩手散手心皺白十指甲縫有沙泥合面髮際有沙泥兩腳心皺白十腳趾甲縫有沙泥

餘無別故委係生前被毆受傷落水身死

焚死三則

附記云按錄內所云驗傷當互證以參合不可執一而論此真三昧語蓋因傷身死形狀各殊真設裝點情偽多端全在檢驗時互證參合大抵有一致命之傷卽必有致傷之旁證唯先就現傷以粗定其致死之大概再就本傷之外如屍身上下前後並坐臥仰仆拳曲各情形及有無別傷并所傷之地之人之時之器設身處地詳細體認旁證自然畢露是否與現傷情形相符真假自洞若觀火矣此卽吾儒格物工夫朱子所云窮致事物之理欲其極處無不到也箇中道理最大最精莽漢輒以迂濶視之欲求冤之洗也難矣隸認集證樓上燒死無可檢驗云嘉慶二十四年永福縣盜犯馬添財等行刦蘇有富家因事主居樓抵禦不能刦財放火燒死無可檢驗當於詳內聲稱隨帶刑件馳抵該處飭令檢驗蘇有富住屋基內存有骸骨七堆其餘衣箱銅碗什物均被燒壞當飭將各骨殖移放平淨地面對眾相驗據件作許貴喝報驗得蘇有富家骨殖七堆問據地保屍媳供稱蘇有富年若干歲某某年若干歲各骨殖均被燒碎無可檢驗報畢親驗無異查洗冤錄

載活人燒死骨殖丟地聲響又載屍被火燒無可檢驗者取件
作親鄰供狀查明燒燬情由據證論擬等語卑職親將各骨殖
內有未燒化者檢取當場丟地響聲實係生前被火燒死屍骨
俱已不全無憑填格取結繪圖附卷並捐給棺木飭將各骨殖
收殮○檢驗殺後燒死骨云乾隆十六年五月初七日據淮河
總保甲具報當帶刑件前詣勘得袁朝玉原住草屋幾間坐東
朝西又南北橫屋二間俱被火燒燬屋外週圍俱係大山並無
鄰近烟戶徐相身死在北首橫屋地上其生前仰身在地是以
仰面皮肉俱已燒化無憑相驗隨飭伴作查照檢骨格逐加細
驗據伴作孫某喝報驗得徐相仰面頂心偏左骨已燒化成灰
偏右骨有血灰凝結用油潤去現傷一道長一寸寬二分赤色
係刀傷顙門額顙額角兩眉眉叢兩眼睛鼻梁骨左一半燒化
成灰左太陽腮頰骨燒化成灰兩胎膊與合面肱肘及兩手腕
兩手掌十指骨燒化成灰左前肋下兩骨有血灰凝結用油潤
去現傷一道各斜長五分寬二分赤色係刀傷兩膝兩臙肋兩
腳腕兩腳板十腳趾骨俱燒化成灰其餘骨殖俱已燒酥合面
脊背起至兩腿止稍有皮肉其色膏黃兩臂下有糞穢兩腳踝
兩腳跟骨俱燒化成灰實係砍傷後火燒身死報畢親驗相符

當場填格取結又於燒屍處所掃除灰燼用炭燒熱將醋潑上
親加查驗地上有人形左手伸右手不現兩腿及足不現頂心
偏右處有血跡鮮紅色驗畢問作作孫某徐相頭上諸骨何以
半邊成灰半邊尙存據供徐相偏右有刀傷必然血往右走故
此燒不化左首無傷定然血枯故此燒化又問凡人胎膊肱肘
廉肋骨均比肋粗大何以徐相胸前兩肋尙存白骨胎膊肱肘
等骨反被燒化據供胸前肋骨裏面有臟腑潤澤不得卽燒成
灰至於肱肘廉肋遇火必然捲縮四面火燒以致成灰又問地
上左手有形跡右手及兩腿俱無又是何故據供徐相左手想
是被倒之柱壓住不得拳縮所以地下現形兩腿及右手定是
縮起以故地下無形

疑難雜說十一則

洗冤彙編載昔文通公檢一屍頭頂破損傷二處滿頭大小傷孔
不計其數皆如刀鋒所鑽圓而且光皎然白骨絕無些少血癰
痕訊之作作行人皆云非生前傷再三訪訊乃知其幼小時曾
患棉花瘡凡此傷孔皆係蟲所蛀食是以大小不一棉花瘡卽

俗所謂禿瘡也

續輯云凡人生前患臙瘡及患癩頭瘡者其臙骨斷骨及頭腦骨均有似鑽刺細孔孔口光潔孔內黃白色亦有黑色者乃因瘡蟲咀傷所致切勿誤作傷痕

集

證載扭毆跌入糞池穢氣衝心內損致死恐係因毆吐血駁頂云益陽縣民李在位與劉玉田五扭同跌糞池劉玉田受穢內損身死原驗仰面面色及兩眼睛黃色兩手心黃致命胸膈左心坎左脊背各傷俱已平復穀道污穢兩脇心黃實係內傷身死奉院批劉玉田如果僅因跌溺事在片刻縱水深數尺斷不致衝心內損若謂當時救起吐血遂指為確憑而先被毆致命胸膈心坎脊背三處傷俱青紫又安知非因傷吐血耶且現在庭訊之時李在位亦供認因傷身死則非被淹所致似屬無疑駁飭確審嗣據覆詳查此案前據報驗劉玉田生傷時據供伊被李在位用拳毆傷並無妨礙惟因彼此扭結伊失足跌入糞池吃下糞水數口穢氣衝心實難忍受經救起後當即作吐嘔血現在心內難過等供在卷先未聲叙入詳實屬疎忽茲復傳到醫生周受堂訊據供稱嘉慶元年三月初五日蒙撥醫生調治劉玉田傷痕據說先被李在位用拳毆傷胸膈心坎脊背三

處並無妨礙後因兩下扭結跌落糞池他吃了幾口糞水穢氣衝心實難忍受起來就作吐嘔血現在心內難過的話醫生診他脉息左手心肝脉弦急右手脾肺脉大是穢氣衝傷心肺所致先用參麻解毒引後用清心解毒湯與他調治因他胃氣閉塞不思飲食總不見效到三月十七日身死他被毆各拳傷先俱平復實因觸穢內損並非被毆內傷可以具結復提該犯李在位查訊據供是日伊與劉玉田爭鬧伊先用拳毆傷他胸膛心坎脊背他並無被毆難受情形因兩下扭結同跌糞池伊撲在劉玉田身上沒吃糞水劉玉田吃了幾口糞水救起後當作吐嘔血說穢氣衝心難過後來劉玉田被毆各傷均已平復因觸穢內損醫治不效身死果因受傷吐血何能與伊扭結毫無妨礙前在代院大人前供說劉玉田因傷身死是說他觸穢以致內傷但未能供得明白等供據此查劉玉田先被李在位拳毆胸膛等處尙能與李在位扭結並無危殆情形迨失足跌入糞池吃下糞水救起卽作嘔吐血聲稱傷處無礙惟穢氣衝心難受有生供作據嗣各傷俱已平復因胃氣閉醫治不效身死又有醫生供證可憑其爲觸穢內損斃命可無疑義將李在位依圖毆殺人擬絞問抵審解完結○推跌吐血已止越二日惡

寒發熱腹痛身死仍以內損論云原驗唐陶氏仰面面色發變
致命額顙有磕傷二點微去粗皮參差不齊兩眼胞口俱微開
兩手微握肚腹低陷兩腿伸舒不致命兩膝各有磕傷一點微
青色餘無別故實係生前磕傷後因病身死率駁陶氏被拖之
時當卽吐血死未及旬恐係內損致斃覆審據屍夫唐文學供
龍奉揪住妻子頭髮拖跌撲地磕傷額顙兩膝那時妻子飯飽
後被拖跌地口內吐血常用童便兌酒給服初八日以後妻子
不時惡寒發熱常叫腹痛伊因貧沒有延醫調治到十三日妻
子身死伊因妻子血已止住過了兩日纔惡寒發熱以爲染患
病症報蒙本縣主相驗把他腹痛情形供出後蒙本縣主覆訊
伊纔一一供明本縣主說是內損身死只求嚴密又奉駁唐陶
氏被龍奉拖跌吐血後伊夫唐文學即童便和酒兌服血已
止住越二日後不時惡寒發熱頻稱腹痛謂爲內損身死有何
證據案關出入必須攷證明白方成信讞覆詳攷之醫宗金鑑
內載有傷損腹痛之證惡寒發熱者血氣兩傷之語核與陶唐
氏致死情形相符此其明證○推跌內損身死駁頂云原驗許
氏仰面致命額顙接連右額角一傷圍圓二寸五分皮微破紅
色係磕傷合面不致命右臂一傷圍圓六寸五分右腿一傷斜

長四寸二分寬五分紫紅色係跌傷穀道污穢帶血餘無別故
實係因傷內損身死奉司駁以許氏被李晚推跌致傷右臂右
腿均非致命是夜許氏又復泄瀉其致死之由因病因傷尙未
確實覆詳據某供當向許氏左肩一推許氏側跌倒地跌傷右
臂右腿李晚跑走許氏不能起身其母某氏扶臥牀上許氏因
跌內損肚疼泄瀉是夜許氏下牀大便黑暗中失足跌地又磕
傷額顙接連額角扶起褲內大便有血調治不效致死據件作
供相驗許氏屍身額顙接連額角磕傷甚輕右臂右腿雖非致
命傷痕頗重所以喝報因傷身死穀道污穢原帶有血褲上亦
有血污伊一時草率僅報穀道污穢並未分晰指報○飽後推
跌內損云仰面面色發變兩眼微開口開有飲食流出肚腹脹
兩手握實係生前內損身死據某供死者被某人推跌當時口
吐酒飯過後復又吐出飯食竝有紅絲不能飲食○弔拷致死
云仰面面色紫赤眼開口開自頭面項至肩甲胸膛俱紫黯
色不致命右手腕與合面不致命左手腕各有繩痕四道均長
二寸二分各寬二分青色不致命左右腳腕各有繩痕四道每
道均長二寸二分各寬二分青色合面不致命兩腳腓脛各有
棍傷一道每道橫長二寸五分寬八分紅色餘俱無故委係生

前縛弔致死據兇犯某供伊令陳住子捉住死者兩手伊在身邊掣出麻繩將死者兩手背縛推倒在地又將繩頭縛住死者兩腳跣作一團齣蛄尋了一條柴棍穿入腿灣同陳住子抬到路旁墳邊擱在墳圈石上將死者身子倒掛過他招出賊因頭面倒垂血凝氣閉變了臉色解下身死○驗活埋云傷令仵作刨開泥土細看屍身尙未腐爛將屍扛放平明地面解除細縛繩帶對眾如法相驗據仵作某喝報驗得某仰面面赤黑兩眼胞開眼睛突有血水流出手腕各有繩痕一道每道長一寸六分寬三分紫紅色胸膛肚腹俱赤黑兩腳腕各有帶痕一道長一寸八分紫紅色合面穀道有糞突出餘無別故委係生前活埋入土氣閉身死○檢活埋云開棺取出屍骨安放平明地面排成人形如法洗檢據報仰面致命頂心骨紅色係被菴悶所致○乾隆五十一年東陽縣檢活埋高德賢屍骨致命頂心骨淡紅色參差不齊浮出腦殼外一綫許願門骨紅色上牙齒微紅色有血瘡蛭脫兩腕骨兩脛骨有繩痕紅色實係活埋氣閉身死○道光二十年八月廣東樂昌縣民盧長發曉從胞長兄盧長潰謀死第二兄盧財舒并活埋幼姪盧添喜盧添福滅口一案檢得盧添喜腦後有紅色一條係刀背傷頂心

骨有淡紅色不浮出牙根聳脫有血瘡週身骨節俱聳脫無血
瘡盧添福腦後有淡紅色一處不整齊頂心骨無紅色不浮出
牙根聳脫有血瘡週身骨節俱聳脫無血瘡據老忤作何發云
打傷下去活埋時口鼻不盡擡塞故頂心骨不浮出紅色亦不
同用力掙命血往上奔故牙根骨有血瘡係受傷後活埋身死當場提
驗是以週身骨節聳脫無血瘡委係受傷後活埋身死當場提
問兇犯紀皆供先經謀殺盧財舒抬屍掩埋哄令兩姪下坑牽正
頭足乘機用刀背石塊從腦後打下伊兩姪覆面跌倒屍上卽
用土石泥沙亂拋掩埋今蒙檢明情願抵罪屍親人証均輸服
具結案無可疑仍照洗冤錄填格通報完案姑存此以備查考

屍傷雜說三十則

附攷云乾隆三十七年浙江松陽縣詳閩民黃祿胞姪黃老四患
大痲瘋症鼻爛眉脫滿身蟲蝕肉腐因黃老四慮痲瘋易於沾
染死後有蟲飛出懇黃祿活埋核與部頒醫宗金鑑大痲瘋症
相符驗無細縷磕碰傷痕將黃祿擬徒○抽風身死有陰陽二
經之別入陽經者邪風外現傷口必然潰爛角弓反張手足拳
曲口吐涎沫口眼由是歪斜如入陰經邪風不能外達毒氣內

附

收傷處不潰爛生前惟懼寒冷口噤不開無手足拳曲口眼歪斜形狀凡驗受風之傷傷在頭面者頭面必腫手脚必拘攣蓋頭爲諸陽之首也傷在身體者其傷浮腫手足不拘攣然無論何處傷風其頂心必腫載醫書○醫宗金鑑載風毒內蘊不發於外瘡口燥起白痴不甚腫互見破傷門○傷寒誤服石膏及妄服桂附參著有七竅流血之慘若以銀釵探入咽喉穀道試看不可作青黑色薛氏醫書

集

微透簪柄乘熱置臍上使簪直立候雞子熱退取看簪如青而微黑卽屬此症再將所餘雞子如法用之使熱氣透內再用葱椒搗爛塗臍上灸三五壯或八九壯得小便益以數壯汗出緊束所灸毋令脫如簪柄不青黑則非陰陽二症

證載驗在塔上跌下身死云仰面面色紫赤頂心有舊刀痕一條長一寸寬一分右腮頰一傷斜長九分寬四分去粗皮紅色係跌地擦傷口眼耳鼻內均有血水流出生前因跌內損身死此案右手小指舊少二節穀道有糞實係生前因跌內損身死此案係無名男子上塔觀看第七層跌下供證確鑿報驗並無損傷據實詳報恐干駁結詳作無名男子上至塔第二層坐在向

西北門檻上看江兩腳踏塔簷站起失足滑跌坐地身向
側倒以致內損竝擦傷右腮頰所有傷痕俱係添填○震傷
腑身死云致命小腹左邊一傷斜長一寸四分右邊一傷
一寸三分俱紫紅色係兩手掌傷合面穀道有糞水流
生前飯後推跌致傷臟腑身死又仰合面均有石磕傷
糞水血汚流出餘無別故委係生前飯後被跌震傷臟
查某失跌後扶起卽捧肚腹喊痛其爲飯後震傷臟腑
壓死祇傷鼻準人中云乾隆五十七年新建縣詳陳正
身拾柴被茶簍壓下仆跌止傷鼻準人中據作供陳正
獨致磕傷身上穿有衣服房地又係平坦故未受傷○
死云勘得古城坡松山有松樹數十株內有一株砍倒
長九丈七尺樹梢圍圓六寸旁有枝節該屍仰臥樹梢
葉承棟指稱葉何氏卽被此樹壓死查驗樹有血跡勘
如法相驗驗得仰面致命顙門連偏右一傷斜長四寸
二寸六分骨碎腦漿流出係樹枝壓傷餘無別故委係
傷身死○布帕縛口氣閉身死云仰面面色紫赤有血
微開口鼻有血水流兩手腕有繩痕一道紫赤色有血

腳有繩痕一道淡紅色有血瘡合面穀道腫突糞出餘無別故
委係生前氣閉身死起出白布帕一條量長三尺三寸寬九寸
連繩帶同貯庫據溫二貴供伊將事上兩手屈轉背後叫鄧亞
三用絢牛草繩縛住兩手伊亦解下絢牛麻繩縛住兩腳事主
驢地喊叫伊與鄧亞三又用腰繫布帕並事主口上纏過結住
後腦正欲跑走事主在地亂滾掙鬆口上布帕大聲喊叫伊又
令鄧亞三將布帕連事主口鼻繫緊事主不能出聲等語杜平
賊犯溫二貴等搶奪牛隻謀殺事主覃文廣案○勒傷咽喉氣
閉身死云仰面面色微赤致命右頰角一傷口微開舌抵齒致
命咽喉繩痕一道長一尺寬三分深二分紫紅色繩痕不交不
致命兩肱左直右微曲兩手腕左直右微曲○奄悶身死云
仰面面色紫黯兩眼胞開兩眼睛微突口微開舌有嚼破痕不
致命左胎膊一傷皮微破係擦傷下身據屍父張添中結求免
驗餘無別故實係生前被菴悶身死○受傷後冒風身死云仰
面面色黃口歪斜口鼻有涎沫合面不致命右肱肘一傷斜長
一寸五分寬一寸現已結痂骨未損血痂擦破傷口浮腫週圍
腫脹委係生前受傷後冒風身死○服壯藥排拍不效發腫身
死云仰面而色青兩眼開上脣吻青口開用銀針探試尙無毒

氣舌縮兩手拳握腹脹合面不致命右臂膊一傷斜長二十三
分寬一分紅色係鞋底拍傷十指甲青不致命左右兩腿俱紫
紅成片微腫係鞋底拍傷餘無別故實係生前服壯藥排拍不
效發腫身死附壯藥方陽起石馬金子巴山虎茱萸地腳魚地
上蚯蚓等分為末晒乾壯者一錢瘦弱者四五分多服者死○
患斑痧身死云驗得仰面面色發變兩眼合兩手微握兩脚
有青筋紫紅癰肚腹低陷兩腳直合面十指甲青黑色遍身有
紅斑用銀釵探入咽喉殺道以紙密封良久取出驗係白色委
係生前患斑痧身死○推跌痰壅身死云仰面面色發變口開
有涎沫流出左手有繩繫痕寬四分深一分紅色係麻繩傷實
係生前痰壅氣閉身死○中風死云仰面眼微開口眼歪斜口
內有涎沫流出兩腳十趾甲淡青色合面兩手十指甲淡青色
委係中風身死又驗口眼歪斜牙關緊閉兩手拘牽兩腳拘攣
○疝氣死云腎囊腫脹青色光亮按捺不堅硬係疝氣方書
三陽急為痕三陰急為疝男子有七疝寒水筋血氣抓癰是也
疝音訕史記倉公傳臣意診之曰湧疝也令人不得前後洩疝
氣客於膀胱膀胱水府也博雅膀胱謂之脬正字通膀胱重九
兩一銖縱廣九寸盛溺九升九合廣二寸半上系小腸下聯前

陰白虎通膀胱肺之府廣韻腹中水府正義曰脾亦作胞○中
 寒身死陰症云驗得某面色微黃兩眼閉上下唇微青色口
 閉不致命胸膛有微紅色一處紅暈浮散不計分寸兩手握肚
 腹平莖縮小餘精流出兩腿伸十指甲青黯餘無別故實係中
 寒急症身死此案審係行姦後開房門中寒身死卽洗冤錄所
 載陰症是也○鐵釘釘傷云驗得某生傷致命頂心及腦後髮
 辮內各釘有鐵釘一枝傷口腫脹卽傳醫生用藥欲行拔出鐵釘
 稱這人是難救治如今鐵釘未曾拔出還是活的若拔出鐵釘
 頃刻卽死不敢醫治訊問某不能言語列單附卷飭取保辜調
 治又驗得某死傷仰面致命頂心有鐵釘一個釘頭縮入腦後
 二分拔出鐵釘皮骨破傷圍圓七分半深透內傷口腫流膿血
 鐵釘長二寸五分合面致命腦後髮辮內有鐵釘一個縮入皮
 肉不及一分拔出鐵釘皮骨碎傷圍圓七分深透內傷口腫流
 膿血鐵釘量長二寸六分兩手腕兩腳腕有縛痕餘無別故委
 係生前鐵釘釘傷身死○爆竹插入糞門點放致死檢骨法云
 乾隆二十七年會昌縣羅輝華等因獲姦夫鍾儀陶用爆竹插
 入糞門點放致死一案檢得鍾儀陶合面左髀骨有爆竹火冲
 傷一處長一寸五分寬九分右髀骨有爆竹火冲傷一處長一

寸五分寬九分委係受爆竹火冲傷身死○毆後咽喉塞布氣
閉身死骨云週身骨殖完全仰面不致命右腮頰骨上下牙根
右頤頰骨相連一傷斜長二寸六分寬一寸九分紫紅色有血
暈係鞋底傷致命咽喉內藍布一團係生前塞入口內右血盆
骨一傷斜長九分寬三分不致命左臂骨連髀骨一傷斜長一
寸二分寬三分俱紫紅色有血暈係竹片傷左膝蓋骨連腿骨
一傷斜長二寸四分寬七分紫紅色有血暈係柴棍傷合面不
致命左後肋骨第五條第六條相連一傷圍圓二寸四分紫紅
色有血暈係拳傷餘無別故○刑夾死骨云檢得某左右兩腳
踝骨內外各一傷斜長二寸寬一寸六分四分圍有血瘰紫紅色
左腳外踝骨傷痕中間有紫黑血暈一點如黃豆大左右腳骨
俱帶紅色委係生前被夾身死○掌責杖責繩捆跪墊身死骨
云檢明張增受兩眼眶骨顙骨均有掌責傷手指骨有繩縛傷
腿骨有杖責傷膝蓋骨脛骨肢骨足掌骨跣骨趾節骨均有跪
墊傷筋骨下有鐐槓傷委係因傷身死○酒醉失足跌傷在頭
面云駁查盧永茂酒醉回歸本係熟路又執燈籠何致跌斃如
係失足或自絆臨高而下則所傷應在腿足臂膊茲屍傷多在
頭面係被人推跌所致洗冤錄載甚明該件作憑何喝報失跌

身死屍親證佐竟不細查均各扶同混供更必有賄和情事復據件作供盧永茂失跌之處在尙家寨木橋巖坎下溪邊巖坎上有小路一條量寬一尺係梭沙子路坎上茅草有壓倒形跡坎下溪邊石上有血跡自坎至溪量高一丈六尺前驗該屍左肩甲右手腕右手背均有儘擦傷痕並非僅在頭面據屍子供稱伊父盧永茂年已八旬精力就衰且梭沙路窄兼之酒醉頭重腳輕向下築跌是以頭面傷多委係酒後失腳築跌情形並非被人推跌據見證某等供盧永茂是夜在盧茂元店飲酒盡歡而散盧茂元尙留住宿非有宿怨深讐自無推跌情事實無賄和扶同混供○醉飽跌死云驗得兩眼胞開口間有血水流出血腹膨脹又仰面面色微赤眼微開口微開不致命左腮頰有傷痕一條左血盆骨有傷一條俱微破係指甲抓傷肚腹脹右腎子縮上用溫醋湯蘸洗以手按小腹腎子始下合面穀道有飲食帶血水流出血餘無別故○酒醉身死云山東高唐州監生趙允迪酒醉身死驗得屍身軟弱上下牙根白色用銀鍍在咽喉內如法試探取出黃白色委係醉死○燒酒醉死云側面面色微青右太陽一傷圍寬一寸一分不整齊紅色微腫係磕擦傷兩眼閉口微開有血水流山上下牙齒搖搖欲落肚腹膨

脹手拍聲響屍身軟弱不硬委係燒酒醉死○膝蓋跪傷云致命小腹左邊一傷圍圓三寸四分紫紅色血癰係膝蓋跪傷○江西萬載縣民朱從信被彭清明等毆傷已越四十一日他傷俱已平復惟左後肋左腰眼二傷原驗紫赤色臨死時亦已退至青色因朱從信受傷後另患他病多服紅花桃仁等破血之藥以致大小便下血而死屍親藉詞具控件作誤認爲內損致斃經府提審以朱從信如果被傷內損何以當時並未便血詳請覆檢無傷定案

論中毒三則

附攷洗冤彙編云人於身死之後其面或青或紫手足指甲或爲青黯或爲紫黑口鼻或爲血出或爲偏身青紫更或有肉爲膚裂爲脫落者豈盡服乎砒鴆而致之蓋世間無一非生人之具則無一非殺人之符偶一相犯卽凝爲毒非特砒鴆爲然而參附爲尤甚人第沈溺於補之一字盡爲迷惑莫之或悟反云服以參苓亦不奏功竟以委之天數抑何愚之至而天數之冤又將何日而後洗哉愚見人日服參附而恣行殘賊不可以對屋漏以致孽業糾纏口鼻流血膚爲寸裂而死者亦自不少且毒

之爲毒暗藏於服食起居中更有令人不可方物者如日用飲食其物性相反不知誤食以及庖人不善烹飪未得其法食之而死者倘執是以爲驗是欲洗冤而冤反因是以愈積矣在善爲體察者更不可以不知

集

證載烏痧脹云仰面而色微青眼合唇微青兩手十指甲微青肚腹微青用銀簪從喉內探視微黑洗之卽去其餘週身反覆相驗竝無別故實係病死訊據伴作供稱查洗冤錄論中毒箇內有云岐黃書中有青筋脹一症卽俗所謂烏痧脹凡此等症候及陰症不救者兩手足指甲皆青黯或盡青紫甚則頭面及遍身皆紫黯緣其血敗積而成色等語又驗服毒用銀簪註云人至死雖非服毒未免有穢故銀簪亦作黑色但洗之卽去唯其中毒雖洗數次其色青黯不能鮮明等語今已死某面脣十指甲肚腹微青與洗冤錄青筋脹陰症等病相同又用銀簪探視洗之卽去實係病死等情親核無異○自殘後痧脹死云驗得已死丁學海仰面面色發變頂心中一傷直長一寸三分頂心右一傷直長一寸一分咽喉一傷橫長一寸五分均皮破血汚業已結痂其痕起手稍重收手輕俱白行用刀割傷兩手足指甲皆青黯肚腹發變腎囊縮小穀道糞出其餘週身竝無別

故實係生前自殘後痧脹身死據件作供洗冤錄岐黃書中之
烏痧脹症候速死不救兩手足指甲皆青黯或盡青紫等語又
醫書症治準繩內載霍亂即俗名絞腸痧其症心腸猝痛嘔吐
下痢轉筋入腹即斃甚則囊縮今驗丁學海頂心等處自刎各
傷雖當致命之處但傷不甚重且已結痂原不致命現據見證
孟韓氏供稱是日丁學海復至譚田氏家索賠被竊牛價行走
說話如常移時忽稱心腹疼痛嘔吐不止未久即時斃命况腎
囊縮小兩手指甲均係青黯用銀針探試無毒其爲痧脹身
死無疑情願具結

諸毒十則

附記云有食紅荏死者紅荏類香苾但香苾生於樹上紅荏生於
地下凡中紅荏毒死者先嘔吐若盡則活否則隔一日而死矣
倘不吐而頭痛腹痛則無不死驗中紅荏毒屍眼開舌微伸肚
腹微脹青黑色穀道用銀釵探入取出黑色
續輕云驗水銀毒用銀針試探取出色白者是包釵紙或布需親
看恐紙布藏白糠灰又名牙灰若用白糖灰一擦釵雖黑色立

變白色不可不防奸人作弄慎之慎之任幕友信宜縣案曾經
試過附以備考

集

證服鉤吻身死云驗得鄭阿星服鉤吻毒草身死仰面面色微
青兩眼胞開兩眼睛俱突上下脣吻俱乾裂上下牙齒全牙根
青色口微開舌縮裂兩手俱微握肚腹有青斑兩肋兩脇俱有
青斑十趾甲俱青色合面髮辮量長一尺六寸十指甲俱青色
穀道腫突用銀釵探入良久取出青黯色再用皂角水揩洗不
去○服砒毒發後越六日身死云乾隆五十四年龍南縣民蕭
金聲案奉司批查信石其性猛烈且原驗脣舌焦裂受毒情形
深重何以延至六日始行斃命訊據仵作供蕭金聲所服砒石
卽洗冤錄所載生砒毒性本緩祇因蕭金聲先患痧氣甫愈又
輸錢熬夜腹臟虛弱以致毒入臟腑登時發作似覺深重後經
醫生用萊豆湯竝解毒藥療救腸胃毒氣稍解拖延至第六日
始斃其所以不致速死者是當日解救至第六日仍死因砒霜
已蘊蓄在臟藥力難達故死後現出脣舌焦裂情形竝無別故
○毒草毒酒云驗得仰面面色青黑兩眼開口開口鼻內有血
水流出口內有草渣碎末肚腹脹青黑色十趾甲青黯合面十
指甲青黯用銀釵探入咽喉穀道以紙密封良久取出青黑色

用皂角水洗擦不去餘無別故委係生前毒斃或中毒身死一作被毒身死又驗上下唇吻捲縮牙根青黑色餘同前○毆後服鹽滷云驗得已死香兒面色發變兩眼俱閉左眼黑珠戳破半個左腮頰有手指擦傷一片左胎膊云云其木器傷四處胸前有手爪傷痕身不發炮肚腹不脹十指俱禿係被毆後自服鹽滷身死見嘉慶二十一年條例一百二十五頁○痧氣兼服毒云仰面面色青黯口鼻內有血水流上下唇吻齒根俱青黑色左右血盆下俱有刮痧痕一條直長三寸寬一寸三分左右兩右胸膛至心坎各有痧痕一條長三寸寬一寸三分俱青黑色兩手胸臑各有刮痧痕一條長三寸寬一寸三分俱青黑色兩手微握肚脹青脹十腳趾甲青黑色合面左手臂膊脊各有刮痧痕一條各長三寸寬一寸三分十手指甲俱青黑色咽喉用銀簪試探良久取出青黑色用皂角水洗擦不去委係生前中毒身死○砒霜毒云仰面面色青黑兩眼睛突出上下唇吻捲縮翻裂牙根青黑色兩手微握肚腹微脹十趾甲青黑色合面十手指甲青黑色用銀簪探入咽喉穀道良久取出青黑色用皂角水洗擦不去餘無別故委係生前被毒身死○又仰面面色紫黯兩眼開口俱有血水流上下唇吻紫黑舌縮舌尖

裂折肚腹脹青黑色十趾甲青黑色合面十指甲青黑色用銀簪探入咽喉穀道以紙密封良久取出青黑色用皂角水擦洗不去竝據繳出藥碗一隻驗有砒霜○服斷腸草身死云驗得仰而面色青黯兩眼微開兩耳竅兩鼻竅有血水流上下唇吻破裂發炮上下牙齒生前全脫牙根紫黑色口開內有草渣隨令取出舌捲縮紫黑色發炮咽喉青黑色有炮兩手微握胸臆肚腹黑脹有炮兩腳直十趾甲青黯色穀道突有糞出用銀簪探入咽喉穀道以紙密封良久取出作青黑色用皂角水擦洗不去餘無別故委係生前服毒身死

意外諸毒五則

集證附糞毒云高平魏莊有豫民張敏等販豬爲業因小豬誤落糞坑二客下坑撈救皆中糞毒殞命驗其牙根骨青黑色上下唇吻發青雍正十三年山西澤州守錢塘朱樟載入郡志附記云守宮毒放之遵生書亦有此說余近見說部書載江南民人有二兒自塾歸其母以乾冬菜蒸肉脯食之時正暑兒食後洗浴久之不出怪而視之則盆中惟有血骨肉皆銷眾盡駭不

知何故乃檢所存積乾菜罈中有大蠍虎二相交於上其精溢

集證服百足蟲身死駁查云四川叙州府隆昌縣民婦鄧氏與鄧

才璵通姦毒死親夫鄧某一案詳請啓檢司批查中毒身死之

案情形不一如中砒霜等毒其骨固屬青黑如中金蠶銀釧等

毒則骨殖竝無痕跡今鄧氏所稱百足蟲與扁豆根是否有毒

能否殺人洗冤錄內既未開載則服百足蟲而死者其屍骨應

作何色似遽難指定倘檢驗屍骨竝不青黑恐亦未能竟指作

無毒之憑據疑似之間更滋淆惑應再提犯悉心推鞠竝取百

足蟲扁豆根令該犯等照前焙乾雞犬試食察其情形揆其事

理詳細研求細加攷證再行詳請委員覆檢庶死者不致徒遭

熬刷之慘而生者亦可期無枉縱再查乾隆四十年有湖北崇

陽縣民江撰南與黃氏通姦毒死木夫王勝才及氏翁姑子女

一家五命案內驗明奏辦可以稽攷○吞鴉片烟云驗得仰面

面色青黑口內有血水流山右手大食中指俱有鴉片烟膏粘

結心坎肚腹青色十指甲俱青黑色穀道突出用銀釵探入口

內穀道取出俱青黑色用皂角水揩洗不去實係生前吞烟毒

發身死○檢服鴉片烟身死骨云檢得仰面不致命口骨上下

不致命齒上下均青黯色致命咽喉骨致命心坎骨不致命兩
手十指骨二十八節不致命十趾骨共二十六節合面不致命
尾蛆骨俱青黑色其餘週身骨節俱青色
餘無別故實係生前吞服鴉片烟毒身死

洗冤錄摭遺卷上

洗冤錄撫遺卷下

仁和葛元煦理齋

寶鑑編

仰面致命傷十六穴

仰面傷痕十六方頂心左右顙門當顙角顙顙頭看畢耳竅咽喉
并太陽兩乳胸膛心肚腹臍同肚脇更須詳腎囊有子看雙獨婦
女陰門恐暗傷

合面致命傷六穴

合面傷痕亦有六腦後耳根須目囑脊背脊脊穴須詳後脇腰眼

相連屬致命止此肩甲血盆腋臍傷內通筋骨死亦速除此皆非致命

痕二十二傷可更僕

致命傷亦分輕重

兩人毆一人兩傷皆致命擇其最重傷先論緊要處次照傷痕之淺深定之罪以一

人定

傷輕却當致命處

受傷輕重亦須詳致命傷輕限內亡色不黑青皮不破雖當死處

亦容商

傷重不當致命處

若是傷重非致命限中限外總無妨但愁拳後登時死致命傷輕

亦抵償

若死者強壯平日無疾病卽坐毆者以罪

未死驗傷

未死之前須保辜受傷要害莫模糊驗時註定傷何處死後分明
獄不誣

已死驗傷

檢屍一報卽親行先鞠屍親口供清照供尋傷詳比對全憑致命
要分明

照供尋傷法已良猶防處處有釘傷龔門髮際兼咽鼻逐處推求

慎勿忙

婦人產門
女子陰戶

屍格親填不假人行凶器械務求真生前殘疾還須問疤痕瘡痕

總要陳

亦有生前磕跌傷紅輕青重論其常

或生前因磕跌受傷傷輕而
新著骨色紅日久則消傷重

而久著骨色青終身
不散莫認作致命傷眾毆但問因何起致命傷痕坐抵償

嘴有掌痕腿杖痕脚經刑夾紫光屯臉間刺字無形迹竹篾輕敲

字尙存

毒在喉間須記取銀釵黑白

黑有毒
白無毒

立時分臥牀血墜身多紫莫

認傷痕冒上聞

銀釵須自帶恐人以
藥煮之則無毒亦黑

驗傷真偽

眞傷堅硬滴水不流假傷柔軟滴水不留

以手指按青紅處是真傷則堅硬指一起仍然

青紅滴水不散便是真傷如係發變處將指一點指起色白滴水卽流便是假傷

未腐之屍兼腫紅色青

色紫不究窮祇緣屍變成青紫四季寒溫變不同

此防屍變誤作眞傷

青紅紫赤黑光分檢骨全憑五色紋色活色呆眞假判眞傷瘡脚

氣如雲

此驗骨傷眞傷以瘡暈爲主由深而淺由濃而淡將盡之處如雲霞如雨脚若紅自紅紫自紫呆板積於一處而瘡

脚全無者則偽造也

紅花蘇木與烏梅著入熬膏點骨骸黃醋潑之紅赤色但無瘡脚

色如堆

此偽造紅赤骨傷

皂礬五倍醋熬醱青黑成痕巧作工法一蘇木若還和茜草加礬潑

醋紫光蒙

又一法此偽作青黑紫赤骨傷

火燃青篾烙成傷焦黑沉沉不見光

擗樹方有

取皮毳潰爛總

無虛腫肉如常

此同下條乃偽作死屍皮肉傷總不堅硬

亦有虛浮焦赤黃係將火罐拔拳傷千般作偽難堅硬手按剛柔

法最良

與上條異者皮肉虛浮耳其不堅硬一也

擗葉塗膚色赤青剝皮

擗皮

火熨

擗皮熨之

倍傷形

以倍傷

任將水

洗痕常在堅硬難逃兩字經

此偽作生前打架皮肉傷亦不堅硬

更有真傷作沒傷醋塗茜草跡偏藏若將甘草投於水抹在傷痕

卽著彰此件作受賄而爲人脫罪

初檢

檢畢屍交地保人恐人殘害失其眞屍親堅執傷痕異覆檢須防

上駁頻

覆檢

覆檢幸無爭屍首交親屬覆檢尙有爭掘坑用門覆加土罨作堆灰印防再覆仍令看守人立狀附案牘看守苟不嚴火化成冤獄

洗罨

先將門扇襯其屍水洗方將糟醋施衣服蓋屍淋熱醋候屍體軟

見傷痕

春秋糟醋宜微熱盛夏炎天熱不宜冷極掘坑須火逼罨屍覆席

醋淋之

湖南春秋時多用火坑恐屍潰不能覆檢宜禁之

檢已爛屍

蛆蟲穢臭水先沖赤色深輕帶黑容皮肉骨粘虫不食卽知此處

被傷凶

此驗有皮肉者打傷刃傷皆見

殺傷屍爛但存骸黑色乾枯骨上堆或有髮絲如碗裂此中破損

卽冤胎

此驗無皮肉而但存骨者指殺傷言

附四時屍變

春三月經兩三日口皮肚皮兩脇胸前肉色微青經十日口鼻內有惡汁流出胖脹浮皮起肥人如此若久病及瘦人半月後乃有此形狀

夏三月經一二日先從面上肚皮兩脇胸前肉色變動經兩三日鼻內汁流蛆出遍身胖脹口唇翻皮膚爛炮胗起經四五日髮落

暑月瘡屍損處浮皮多白不損處却青黑要將浮皮剝去如有傷則底下血瘡分明或九竅未有蛆出却於太陽內髮際內兩脇腹內先有蛆出必此處有傷

秋三月經兩三日亦先從面上肚皮兩脇胸前肉色變動經四五日口鼻內汁流蛆出遍身胙脹口唇翻胞脰起經六七日髮落

冬三月經四五日肉色黃紫微變 或安在濕地用草薦裹埋卒難變色

以上但言其略人有肥瘦地有南北節氣有遲早又當隨時變通

檢骨

掘坑燒炭醋熬瀦取骨穿麻次第聯扛骨入坑蒸兩候出將油傘

單晴天

又云骨久為風雨剝蝕或因蒸檢多次久而黑黯者亦用油傘向日照之傷可見又云陰雨用蒸法以炭火煮醋多

入青鹽白梅同骨煮千百滾水洗驗之亦向明照看血皆浸骨

煮骨時恐作作置藥水中令骨色昏黑不辨用麻黃甘草為末各二兩俟水沸投入煮過洗淨仍入地窖蒸之立見

生前被打癰微紅骨斷頭間血色同

骨斷處其接續兩頭各有血暈色

損折若無

紅活色定知死後理難蒙

此辨生前死後骨傷亦有跌仆杖痕年久不去然其色深黑無痕暈

附骨節數目

人有三百六十五骨應週天之數

髑髏骨男子自頂及耳并

腦後共八片

蔡州人九片

婦人六片腦後橫一縫男子當正直下別

有一直縫婦人直下無一縫 牙二十四至三十六不等胸前

骨三條心骨如錢大一片項與脊骨各十二節 自項至腰二

十四髓骨肩井及左右飯食匙骨各一片 左右肋骨男子各

十二條

八長四短

婦人各十四條

男女腰間各有一骨大如掌有

八孔作四行樣

手脚骨各兩段

男子左右手腕及左右肱

肘骨邊皆有髌骨婦人無 兩足膝頭各有額骨隱在其間如

大指大手掌脚板各五縫手脚大指及脚小趾皆兩節餘皆三

節

尾蛆骨若豬腰子仰在骨節下男子其綴脊處凹兩邊有

尖瓣如稜角週布九竅婦人其綴脊處平直只六竅大小便處

各一竅

其餘血盆頂心太陽結喉背鼻山根印堂腦角腰門

皆致命處 小腹腎囊陰戶產門另詳踢傷條檢骨畢筆以號之紙以裹之繩以束之印以封之桶以盛之坑以埋之標以記之灰以印之

滴血

祖孫父子氣相通滴血枯骸入骨中若是用鹽先洗骨親生骨血

不相融

此骨埋他鄉子孫認祖父母父母骨法

弟兄父母本先天滴水能和一氣連但恐醋鹽先入水不相連處

也相連

上以鹽洗骨而不入此以鹽入水而轉合 一說夫婦可以滴水存疑可也 又云器大水

多兩血相去遠離雖父子兄弟亦不合或滴有先後血分冷煖則不合

檢地

打死將人燒作灰芟除燒處草根荻用柴燒地全須熱再取胡麻

數斗來

三訣全用其義乃備

鋪來埽去麻油出入地成形是死骸被害傷痕麻結聚方圓大小

逐層開

無傷之處麻不結聚

胡麻戀處見傷紋除盡胡麻猛火焚糟醋潑來還燒地覆來漆桌

自形分

明亮金漆桌覆地二少頃桌面人形畢見

毆傷屍訣

口眼俱開手不拳青輕紫重黑猶堅溺汚衣亂形無定細把傷痕

仔細研至重者紫黯微腫次重者紫赤微腫又其次者紫赤又其次者青色出限外微青

手足傷

拳傷不盡是圍圓若是圍圓定屬拳

在上三兩及胸前上一掌傷肋脊背脊骨之間

一掌傷

人餘指迹前分後合不相聯

非致命處未必死

踢傷先要看鞋尖草履傷浮布履堅若是釘鞋兼木屐骨傷深處

定難痊

在下三兩小腹肚臍腎囊陰戶或前後心腰脇之間踢傷下部不分男女其痕皆見於上男子現於上下牙根裏骨

傷左則居右傷右則居左傷正則居中女子現於上脛其左右中亦然小腹受傷亦同抓破腎囊顙門血紅以血奔於上也牙齒脫落以疼極咬落也又婦人閱一人則羞秘骨上加青一點不可誤作傷痕

手脚難憑上下分推人撲地亂紛紛如何執定拳和脚上下堅持

舊律文

拳大脚小此定論也然脚傷亦有大者

他物傷

如鐵尺斧頭刀背木棒馬鞭木柴磚石瓦塊鞋底之類

持物傷人左半多頭顱胸肋定先過若從近後由前打右損方稱

亦是他

亦須究問行凶人平日使何手

棍棒毆傷迹必斜兩人高下看毆加情形下手同傷合左右長寬定不差

骨上斜長木器傷圓尖三角石磚當方長潤短終歸鐵紫色深紅

骨豎芒

鳥鎗傷屍未腐看鎗眼屍既腐看鎗子更防件作私懷鎗子

殺傷訣

被殺之人口眼開髮寬手握要先推若非一刺身隨死手上傷由

奪刃來

殺傷大者皮肉捲凸若透膜腸臟必出

殺傷先要捉凶人凶器收來畫樣真器或未收須苦主畫刀書押

訊緣因

凶刀日久血痕不見用炭燒紅醋潑即見

殺傷亦是左邊多傷右端由左執戈若是臥牀難定論隨時隨地

看如何

其人左手執箸者則動刀亦或用左手如其人習用右手

手臥者不順則刀尖亦必向下而微傷其右肩窩平日習用左手

傷其左肩窩須詳辨其左右則得之

殺傷辨生前死後

生前痕潤死痕齊

皮肉如舊痕必齊截

生血如硃死是泥

黑皮

皮縮是生鬆是

死一紅一白色無迷

生前色紅紫死後色乾白

生前血癰四圍週死後全無血氣浮痕下血流指即止生傷指去

血還流

生前被傷皮縮骨露死後殺者兩頭不見血癰以氣血不行故也 檢支解屍手臂腿脚各量相去遠近開寫訖湊

屍收檢

活時頭截筋偏縮骨凸皮拳聳皺肩死後項長無聳皺不拳不凸

異生前

驗身首異處者先令屍親辨認屍首再量身與首相去遠近或左或右去肩脚若干尺寸

自勿訣

生前使手將何手再驗傷痕血果流流是生前非則死淺深左右

要詳求

白刎之人兩手拳肉黃髮聚臂還旋要知口眼終須合類別情殊

細註詮

自刎之情各殊口眼亦當微辨如係忿恨而刎者牙必咬緊眼必微張而上視以胸有不平故也如係氣鬱而刎者

眼雖閉而不緊口則微張而牙關不合以氣忿不舒故也若畏罪被逼無可奈何而刎者則口眼俱合乃視死如歸即欲以死卸責也揆乎情理如此更須審其人之生前或强悍或柔懦與夫年之少壯老而分別之

二寸傷痕屬小刀

或一寸五分亦小刀

四三定用食刀操氣喉割斷隨時死

起重收輕理莫逃

氣噪在右用左手刎者多傷右故氣噪無救食噪在左用右手刎者多傷左故食噪可救用右

手則左重用左手則右重

喉下傷痕則一刀痕多刀屬別人操淺深左右詳加辨自刎人傷

理莫逃

因痛不能再割

一寸三分傷食系

三日後死五分承上句各

氣系乃微傷七分食氣俱

傷斷

亦止一處傷

不待三朝立即亡

剝指雖非致命傷生前死後亦須詳生前向裏皮當捲死後齊平

盡反常

生前流血口咬手指亦致身死

自縊訣

縊死眼合口唇焦八字傷痕兩不交紫赤傷痕兼黑色橫長九寸

有餘繞

至一尺止

勒當喉下牙關緊閉口微微舌咬尖

一曰抵齒不出

喉上口開兼舌吐二

三分出口流涎

面光紫赤脚尖垂大小污知袴內遺腿有瘡紋如火炙腹中氣墜

現青皮

又云大腸頭有一二血點

縊痕深淺看虛實

脚虛則深實則淺

繩細繩粗亦辨之帛幅自然痕散漫

人分肥瘦淺深隨

有活套頭死套頭單繫十字其活套頭死套頭脚到地并膝跪地俱可死其單繫十字懸空方

可死脚尖踏地即不死

或用繩纏一兩遭上不相交下却交亦有繩纏三四道非關勒死

莫冤招

八字不交之處必有淡痕向上而漸微

移屍覆帛兩痕存青紫前痕白後痕血瘡有無須辨別

覆帛無血瘡免

教死者作冤魂

縊死血障成青紫莫作毆傷服毒情若是病人求速死必將縊物

手中擎

狀如勒喉下者見前

一路無塵知死後塵氛亂動屬生前縊死脚下開三尺見炭方知

地未遷

以死地而感死人其迹如此無足爲異

勒死訣

毆勒屍形迥不同口開手散髮蓬蓬

口眼開舌不出亦不抵齒手脚不垂

沿身磕擦

因掙命更有傷痕別處攻

或項下有指爪痕或手足有束縛痕

隔物傷人亦不交

如在窗櫺樹木庭柱等勒死亦八字不交餘無不交

深痕全在項喉遭耳

根髮際無形迹執此求之定不消

背殺者八字痕平向後其末向下面漸微其痕多在喉下

勒而未死弔隨之深淺難淆辨最宜縱以縊時纏兩道血痕輕重

各差池

自縊痕輕勒痕重

溺水訣

生前投水指藏沙死後無沙定不差口鼻再能分水沫

生前口鼻有水沫死

後則無

腹膨脚皺豈能遮

生前腹脾胃脚皺死後則否檢骨則取髑髏骨將壺貯湯從腦後灌入如鼻孔有沙泥

即是生前生前投水者男伏有銀錢在身則不伏女仰手足俱向前口合眼合亦或開閉不定手握腹急脹拍著響脚底皺白不脹髮緊指爪有沙泥著鞋則鞋內有沙泥口鼻內有水沫及淡血或有磕擦損處打死推入水者肉黃不白口眼開兩手散腹皮不脹口眼耳鼻無水沫瀝出指甲無沙泥兩手下拳縮脚底不皺白身上致命傷痕俱黑色生前入井者指甲頭髮有沙泥死後無腹皮胖脹死後不脹側覆臥之口內有水流死後無大抵自投井者須脚先下若頭在下恐被人趕跌或推送入井死後俱與

溺水

焚死訣

生前口鼻有烟灰骨殖聲響石堦

響者生前不響者死後

死後無灰兼不

響生黃死黑色全該

焦而黑者死後膏而黃者生前不可偏執一見合數者驗之百無一失

湯潑訣

推倒湯中傷臀腿湯潑頭面及胸膛自傷手足兼臍腹死後難紅

炮不揚

生前皮肉皆拆皮破白色肉多爛赤死後潑湯色白不爛無炮又一說非傷及前後心不能致死

服毒訣

銀釵試毒法如神藥煮須防作人見黑再將皂角水擦來不去

乃爲真

服酒與水銀及泔衣灰水者皆試探不出

婦女訣

處女無姦陰有血孕婦懷胎腹必堅有胎埋葬還能下臍帶依然落膝前

處女憂思成血塊或疑胎孕負冤情要知胎孕看衣膜血塊無胞

或像形

亦有血塊無形者亦有如蛇如鼃者

孩屍訣

腹中孩死衣胞紫生下屍紅白色胞亦或招喉兼閉氣面光紫色

理難淆

氣喉或招斷

石香秘錄

檢驗

驗屍有發變之處以指按之若軟者真發變如硬者係被傷淤血凝滯卽以驗其色及何器所傷發變之處如多以燒酒同醋調和嗅於上若真發則沾溼如傷處卽乾不溼

凡拳打傷圍圓分寸顏色不等

脚踢傷牽長圍圓分寸顏色不等

磕傷圍圓樣

擦傷是皮破

木器傷斜長分寸

磚石傷參差不齊分寸顏色不等

鐵器傷皮開肉綻兩邊堅硬紫黑色

跌傷皮肉一片顏色不等

凡日久驗骨拳傷者骨傷如豆大

脚傷者骨傷月牙樣尖斜

木器傷者骨傷如線

磚傷者骨傷尖大

鐵器傷者骨傷略散大

屍之傷痕大驗時可以量分寸骨之傷痕小驗只報某器傷骨細骨斜難量分寸字樣如要量須以燈草量之然不若不量分寸爲妥蓋初驗時則傷痕細再蒸一次其傷又大與初驗之傷痕分寸不同必干上駁也

只照初驗比傷痕不另報分寸爲是

凡滴血不必拘定骨頭在身上之骨皆可滴或經日久風雨剝損須洗刷白將鐵鉗炭火烘之然後刺血滴上看其沁入有血瘡方是活人刺血將兩人之手指竝爲一處用刀橫刺兩人之血齊入水中看其相合凡男子骨白有傍骨婦人骨黑無傍骨男子下部有傷瘡入牙根裏骨婦人下部有傷則瘡于胯骨男女臟傷俱瘡

于肋骨人身之骨皆白惟心頭排子骨兩面皆黃黑色蓋心爲聚血之處故其色然若被傷則有紅色男子臂腿正骨傍有細骨卽爲傍骨女子未行經骨白行經以後則血流散骨黑無傍骨小腹與大腹皆無骨被傷則癢于肋骨上故驗時止驗肋骨生前打折骨者其骨縫綻處必有血痕死後打折則無血痕有因竇青黑衣下棺檢驗時其骨青黑者以碗片刮之卽見肉中之白色蓋此色在浮面故一刮卽去若眞傷在骨卽刮其色不去若以灰袋悶死者頂骨必裂碎溼紙或別物悶死者頂骨必紅色腦後腳踝腳跟
有頂撞傷更看其手足膝蓋有無束縛傷痕

凡被傷顙門太陽腰眼腎囊登時殞命其傷腰腎者必笑

凡捻碎腎子而死者傷癰于頂骨上有碎路

凡自縊死者日久皮肉消爛檢骨則傷映于兩耳根前

凡被人勒死者咽喉有圍頸繩痕不起向下交匝結締在于面前
不拘左右兩背俱曲兩手微握

凡死後血脈已定假作生前縊死者咽喉繩痕俱白竝無顏色

凡被人叉死者咽喉中間有手叉痕路兩邊有指甲痕俱有顏色
面赤唇吻流出涎沫胸腹有傷

凡生前溺死者十指甲兩鼻竅俱有泥沙腹或全脹或半脹兩手

脚皮俱皺白日久檢骨則取髑髏骨洗淨將熱湯從腦後門穴灌入有泥沙蓋鼻息取氣吸入死後入水則無

凡死後推入河內鼻竅指甲無泥沙腹不脹手脚不皺白色青黑凡將死而氣不絕推入河內者兩鼻竅指甲無泥沙腹肚微脹手脚微皺傷痕不甚堅硬顏色或紫紅不等

凡被人用刀殺死者刀路平剗門大而且深皮縮有鮮血污眼睛聳出

凡用刀自刎死者持刀之手拳握必固起手重則深收手輕則淺兩邊皮縮有鮮血要量濶狹分寸持刀之手有血

凡死後假作生前自刎兩邊刀路齊截皮不縮無血卽有血亦是黑持刀之手拳握不固

凡碗鋒自抹死者創門不齊不大若深則死淺則不死有鮮血汚凡被鳥鎗打死者有鐵砂眼孔圍圓腫脹其色焦黑或紅紫色不等隔幾日死者火氣內發孔爛肉黑

凡被秤梗通糞門死者兩眼胞瞋起兩手脚指俱拳縮大陽拖出四五分有血流出日久皮肉腐爛檢骨則頂骨有十字樣紋

凡服毒酒死者週身皮肉俱黑腹背俱發小泡七竅流血眼耳鼻口出舌有芒刺唇吻碎十指甲青黑色肛門突出有血

凡將毒藥插和食物服而死者週身皮肉或青黑或紫黑胸背無泡七竅不盡出血舌黑無芒刺十指甲青黑色

凡服毒死者面色黃週身皮發亮黃色鼻口內涎沫流出嘗之甚鹹腹低壓十指黃或青黯色滿身經絡俱收縮如吃滿太多皮肉俱青與毒相似或面色微紫赤唇吻皮皺牙根微紅色舌縮微細小泡

凡婦人墮胎死者產門必有惡血流出傷胎死者心下至臍腹堅硬如週身無故須看陰戶有無他物暗傷產後死者胸膈兩脇俱有微青色頂心骨有紫色樣

凡患癆病死者身體瘦弱遍身皮肉黃白色

凡氣膨死者肚腹不堅硬拏之則凹放之則高

凡食膨死者肚腹亦不堅硬拏之則凹放之則高彈去甚堅硬

凡血膨死者四邊俱有血癰筋穀道流血

凡水膨死者當絕氣時卽有黃水流出腿脚俱胖脹

凡瘋病死者皮膚有紫點兩手脚俱拳縮口眼俱癱

凡驚風死者鼻梁十指俱青牙齒咬緊肚腹堅硬

凡番沙死者兩眼俱合十指甲青黑色兩脇有青筋紫紅癰不
等胎膊兩脇胸膈肩下兩傍等處有痧斑癰

凡殺死姦夫姦婦每有真僞以大缸盛河水井水各半名曰陰陽水以棍棒攪成旋渦急以男女頭入水中如真姦兩鼻皆對否則兩頭各背一上一下

凡服銀黝死者驗時無故檢時顙門偏左右骨俱紅色脊背骨內外俱紅黑色起霉斑兩肩骨絡兩手骨絡兩臂大腿骨絡俱有蜂窩係毒氣損

凡吞金死者其骨黃

凡服毒死者用銀簪探試沃以滾水不可太多多則腹裂

張篠原署豐順

時親見之

凡死屍沉溺河內無從打撈者用蘆蓆一張上放舊筆一枝浮于水面聽其漂流到有屍處筆頭卽能動搖指定所喚人撈之屍可得矣

此說係楊中丞口傳

命案驗傷總論

凡命案全賴屍傷大凡以黑黯者爲最重赤腫者爲次重紅腫又爲次紫紅爲新傷黃黑爲舊傷驗屍之時仰面自頂心以至指甲合面自腦後以至十指甲縫何傷爲重或青黑或赤黑係湯火銅鐵傷木傷拳傷脚傷磁傷墊傷擦傷磕碰傷及有無皮破骨損竝深淺大小長短濶狹方圓逐一親驗之後填註圖格追取凶器與

傷比對是否相符當場訊明各犯口供是否相對逐一詳細聲敘取結附卷毋致遺漏

凡殺傷身死之人有幸限內外之分抽風他病之別幸限內外身死者必須查明死者被傷及身死年月日時其抽風他病者必須詳驗傷痕會否平復傷口有無潰爛口眼手足有無進風形狀實係患何病症身死并醫生地隣屍親人等確供

一自盡各案雖與真正命案自覺簡易惟是情僞百出機械變詐不可測度有將殺死而故作自刎者勒死而報作自縊者有推入河井裝作自投自溺者此中情節當細心推究如果自縊者其縊

痕斜入髮際髮不亂八字不交以及口眼俱閉腿有炙斑自勒者結扣在前兩手拳曲脖項無掐抓傷痕投井者如果肚腹膨脹有水兩手拳曲足心皺白趾甲縫俱有沙泥自刎者如果刃痕齊截左右有深淺之別沿身上下別無傷痕又加衆証確鑿毫無疑實者卽照常隨詳擬結如有不實卽按洗冤錄內相驗之法查明通報再行覆訊

覆檢

凡覆檢之事皆因初驗草率或吏胥受賄匿傷以致屍親不服曉告訐始萬不得已而用之至蒸刷之法洗冤錄內開載甚詳如

法檢驗自無錯悞但須訊明兇犯與原告干証供詞定詳如服鹽服毒自必通身檢驗毋庸置辨矣若用鐵器械毆傷只須憑原告所供處所取具如虛反坐甘結止于所指傷處檢驗蓋人一生每多跌蹠或生瘡或毆或負重著肩血不流行傷輕者日久則消傷重者終身不散著骨則青一不理會原告干証本供一下打死而渾身檢驗喝報傷痕數十處迨經上司駁詰則增毆打情節以符之刑鞫逼供含冤莫訴是誰之過歟

一棍傷斜長而在骨頭圓則未必盡斜長也磚傷方長而磚角磚塊未必皆方長也鞋尖傷月牙形而腳底踢傷未必盡月牙形也

臨時宜仔細有致命之處有致命之傷頂心顙門耳根咽喉心坎腰眼小腹腎囊此速死之處腦後額角胸膛背後脇肋此必死之處色青黑皮破肉綻骨裂腦出流血腸出此致命之傷致命之傷當速死之處不得過三日當必死之處不得過十日當致命之處而傷輕或極重之傷而非致命之處自當詳悉推求不可拘泥成見也

檢屍之弊通出于仵作之口如真正人命受人財賄過手頭顱有傷則云跌磕胸坎有傷則云自槌服毒者銀鉗探驗黑色則云穢氣所冲諸如此弊不可枚舉明慎者于此當近屍親驗不厭污穢

詳細察其真偽驗屍傷果與兇器合否或與所証之物件同否如額傷以毆爲跌磕在額而面目不能無傷也如胸坎有傷果出自槌多以偏左死者生前用左手則必偏右斷不中分也果爲穢氣所沖則擦之易去真毒擦之亦不去也至于生前服毒黑及骨髓死後中毒止抵肚腹亦不可不辨也

仲振履幼時聞老千作作者云檢驗時用鹽藏指甲縫間

臨時擦傷遠則其傷不見是亦不可不慎也

驗傷機要

長濶深圍傷有分寸青紅紫赤色有淺深金石竹木手足他物痕有輕重砍戳毆踢磕擦跡有大小雖不盡同而因色辨傷因傷辨

械要有相同之勢惟在相驗時留心體認庶能傷確情符

驗生傷

註明係何械傷及長濶圍圓分寸顏色如係皮破血結或已罨護不便揭驗探量者不妨據實聲明無傷處所統括以餘無別故一語驗婦人傷須帶穩婆

無名屍

着何服色衣褲屍旁有無遺物地上有無血跡何處起何處止逐一聲敘

檢漫地枯骨

將零星碎骨檢齊驗明骨色明亮並無青黑須報明某骨幾塊不
全有無齒痕咬印衣服曾否拉碎有無血跡某骨衣服離屍多遠
或東或西頭髮多少襪襪是否齊全

腎子傷辨驗

相驗屍傷周身致命之處凡遇受傷俱係皮骨相連傷痕顯露惟
獨腎囊乃係下懸虛軟或被腳踢或受他物刺擊腎子傷重一時
升入腹下氣血攻心必致昏迷不語殞命登時者既不皮破血流
又無青紅高腫可驗確與洗冤錄所載或宿患疝疾因怒激發而
死則腎子宿入腹中等語情形相似查洗冤錄指南舊說用溫醋

棉絮拂耨片時腎子自下可以驗傷或云驗上下牙根肉內現有
形如瓜子紫紅色痕卽係腎子受傷致死如無應查有無宿患等
語再聞有此等受傷致死之屍雖如法醋絮耨下腎子亦無相驗
正傷如遇天寒牙根亦無紫紅色痕驗顙門必現紫紅色大如瓜
子傷左偏左傷右偏右因週圍有血暈滴水不流者方實此誠可
辨疑難有益于相驗也

洗冤錄撫遺卷下